


南北朝文鈔

二







南北朝文鈔
(二)

彭兆蓀輯

編主五雲王
編初成集書叢
鈔文朝北南
冊二

中華民國二十五年十二月初版

輯者 彭 兆 蓀

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

編

南北朝文鈔卷下

答蕭子雲上飛白書屏風書

簡文帝

得所送飛白書。縑屏風十牒。冠六書而獨美。超二篆而擅奇。乍寫星區。時圖鳥翅。非觀觸石。已覺雲飛。豈待金璫。便覩蟬翼。問諸衣帛。前哲未巧。懸彼帳中。昔賢掩色。

源按子雲字景喬。齊豫章文獻王嶷子。建武四年。封新浦侯。梁天監初。降爲子。弱冠。便留心譔著。成晉書一百一十卷。詔付祕閣。起家祕書郎。遷太子舍人。又譔東宮新記二十卷。遷北中郎外兵參軍。晉安王文學。司徒主簿。丹陽尹丞。中大通三年。出爲貞威將軍。臨川內史。在郡以和理稱。民吏悅之。累遷侍中國子祭酒。善草隸。爲世楷法。高祖嘗論其書曰。筆力勁駿。心手相應。巧踰杜度。美過崔寔。當與元常並驅爭先。其見賞如此。百濟國使人至。建鄴求書。適子雲爲郡。維舟將發。使人於渚次候望。子雲遣問。答曰。侍中尺牘之美。遠流海外。今日所求。惟在名迹。子雲爲停舟三日。書三十紙與之。獲金貨數百萬。

答新渝侯和詩書

簡文帝

垂示三首。風雲吐於行間。珠玉生於字裏。跨躡曹劉。含超潘陸。雙鬢向光。風流已絕。九梁插花。步搖爲古。高樓懷怨。結眉表色。長門下泣。破粉成痕。復有影裏細腰。令與真類。鏡中好面。還將畫等。此皆性情卓絕。新致英奇。故知吹簫入秦。方識來鳳之巧。鳴瑟向趙。始睹駐雲之曲。手持口誦。喜荷交并也。

源按新渝侯名映。字文明。始興忠武王憺子。聰慧能文。特被東宮友愛。常預密宴。歷官至給事黃門郎。廣州刺史。卒諡曰寬。

與湘東王論文書

簡文帝

吾輩亦無所遊賞。止事披閱。性既好文。時復短詠。雖是庸音。不能閣筆。有慙伎癢。更同故態。比見京師文體。懦鈍殊常。競學浮疎。爭爲闌緩。元冬修夜。思所不得。既殊比興。正背風騷。若夫六典三禮。所施則有地。吉凶嘉賓。用之則有所未聞。吟咏情性。反擬內則之篇。操筆寫志。更摹酒誥之作。遲遲春日。翻學歸藏。湛湛江水。遂同大傳。吾既拙於爲文。不敢輕有持撫。但以當世之作。歷方古之才人。遠則揚馬曹王。近則潘陸顏謝。而觀其遣辭用心。了不相似。若以今文爲是。則昔賢爲非。若昔賢可稱。則今體宜棄。俱爲盍各。則未之敢詳。又時有效謝康樂。裴鴻臚。文者亦頗有惑焉。何者。謝客吐言天拔。出於自然。時有不拘。是其糟粕。裴氏乃是良史之子。了無篇什之美。是爲學謝。則不屆其精華。但得其冗長。師裴則蔑絕其所長。惟得其所短。謝故巧不可階。裴亦質不宜慕。故胸馳臆斷之侶。好名忘實之類。方分肉於仁獸。逞卻步於邯鄲。入庖忘臭。效尤致甌。決羽謝生。豈三千之可及。伏膺裴氏。懼兩唐之不傳。故玉徽金銑。反爲拙目所嗤。巴人下里。更合郢中之聽。陽春高而不和。妙聲絕而不尋。竟不精討鑄銖。核量文質。有異巧心。終愧妍手。是以握瑜懷玉之士。瞻鄭邦而知退。章甫翠履之人。望蠻鄉而嘆身。詩既若此。筆又如之。徒以煙墨不言。受其驅染。紙札無情。任其搖蕩。甚矣哉文之橫流。一至於此。至於近世。謝朓沈約之詩。任訪陸垂之筆。斯實

文章之冠冕。述作之楷模。張士簡之賦。周升逸之辯。亦成佳手。難可復遇。文章未墜。必有英絕。領袖之者。非弟而誰。每欲論之。無可與晤。思言子建。一共商榷。辯茲清濁。使如涇渭。論茲月旦。類彼汝南。朱丹既定。雖黃有別。使夫懷鼠知慙。濫竽自恥。譬斯袁紹。畏見子將。同彼盜牛。遙羞王烈。相思不見。我勞如何。永明中。王融。謝朓。沈約。文章始用四聲。以爲新變。至是庾徐父子。轉拘聲韻。彌爲麗藻。簡文論及之。此依梁書本。續文選依南史。比此少數語。

古諺云。山川而能語。葬師食無所。肺腑而能語。醫師色如土。此書煙墨一聯實祖此。源按歷方古之才人。方當作萬。良史之子。子當作才。望蠻鄉而歎身。身當作息。

答齊國餉雙馬書

梁元帝

名重桂條。形圖柳谷。襄陽地穴。近求未易。滇池水裏。遠訪猶難。價匹龍媒。聲齊驥子。河精曜采。似伏波之鑄銅。震象飛文。笑東瀛之刻玉。加以控斯銀勒。利此金銜。鞍揭鏤衢。光含兩月。纏縈紫纓。色麗雙絲。方噴晉后。恆乘鄭國之駟。更鄙曹君。輕餉蜀王之馬。

與武陵王書

梁元帝

甚苦大智。季月煩暑。流金鑠石。聚蚊成雷。封狐千里。以茲玉體。辛苦行陣。乃眷西顧。我勞如何。自獯醜憑陵。羯胡叛渙。吾年爲一日之長。屬有平亂之功。膺此樂推。事歸常壁。儻遣使乎。良所遲也。如曰不然。於此投筆。友于兄弟。分形共氣。兄肥弟瘦。無復相待之期。讓棗推梨。長罷懽愉之日。上林靜拱。聞四鳥之哀鳴。

宣室披圖。嗟萬始之長逝。心乎愛矣。書不盡言。

武陵王紀。武帝第八子。帝特愛之。以爲都督益州刺史。曰。天下方亂。惟益州可免。故以處汝。帝崩。紀稱帝于蜀。元帝時與紀書。許其專制岷方。紀報如家人禮。已而兵屢敗。遣使論和。元帝不許。樊猛獲紀。紀曰。卿送我一見七官。猛曰。天子何由可見。并其子殺之。大智。武陵小字也。○每覽蕭氏自相屠僂。輒爲酸鼻。當時諸人。若不著天子癩于胸中。不失爲長安布衣也。

源按無復相待之期。待史作代。

與肅諮議等書

梁元帝

蓋聞圓光七尺。上暎眞珠之雲。而門五色。傍臨珊瑚之地。化爲金案。奪麗水之珍。變同珂雪。高元霜之彩。豈不有機。則感感而遂通。有神則智。智而必斷。故碧玉之樓。升堂未易。紫紺之殿。入室爲難。必須五更之信。以信爲首。六度之檀。以檀爲上。故能捨才從信。去有卽空。率斯而談。良可知矣。竊以瑞像放光。倏將旬日。蹈舞之深。形於寤寐。抃躍之誠。結於興寢。稍覺十字之蒸。嗚何曾之饌。五鼎之味。笑主偃之辭。龜羹麟脯。空聞其說。羊酪猩脣。曷足云也。困于酒食。未若過中不餐。螺蜆登俎。豈及春蔬爲淨。欲吾于三日。潔齋自寅至戌。一中而已。自有米如玉。銳鹽類虎形。雲夢之芹。遼東之藻。十斤之梨。千樹之橘。青筍紫薑。固栗霜棗。適口充腸。無索弗獲。八功德水。竝入法流。四土俱至。偕讓宏道。同志爲友。豈不盛歟。

源按史蕭介本傳。普通三年。爲湘東王諮議參軍。元帝此書。疑是與介之作。介字茂鏡。蘭陵人。穎悟有

器識。歷官都官尙書。多所匡正。高祖甚重之。中大同元年。以疾辭職。太清中。聞帝許納侯景。上表極諫。帝省表歎息。卒不能用。年七十三。卒於家。

與交友論隱書

江淹

淹者。海濱窟穴。弋釣爲伍。自度非奇力異才。不足聞見於諸侯。每承梁伯鸞臥於會稽之墅。高伯達坐於華陰之山。心常慕之。而未能及也。嘗感子路之言。不拜官而仕。無青組紫綬。龜紐虎符之志。但欲史歷巫卜。爲世俗賤事耳。而黜然十載。竟不免衣食之敗。何則。性有所知。不可韋弦者有五。一則體本疲緩。臥不肯起。二則人間應修。酷嬾作書。三則賓客相對。口不能言。四則性甚畏動。事絕不行。五則愚僻妄發。輒被口語。有五短而無一長。豈可處入問邪。知短而不可易者。所謂輪椎分定也。猶如雞鶩之有毛。不能得鸞鳳之光彩矣。況今年已三十。白髮雜生。長夜輾轉。亂憂非一。以溘至之命。如星殞天。促光半路。不攀長意。徒自欺取。筋驚髓冷。殊多災恙。心頑質堅。偏好冥默。旣信神農服食之言。久固天竺道士之說。守清淨。煉神丹。心甚愛之。行善業。度一世。意甚美之。今但願拾薇藿。誦詩書。樂天理性。斂骨折步。不踐過失之地耳。猶以妻孥未奪。桃李須陰。望在五畝之宅。半頃之田。鳥赴簷上。水匝階下。則請從此隱。長謝故人。若乃登峨眉。度流沙。餐金石。讀仙經。嘗聞其驗。非今日之所言也。誰謂難知。青鳥明之。貴布筆墨。然亦焉足道哉。王志堅曰。文通自敍及此二書。皆閒退止足之語。雖仕宦終身。其素心微尙。可想而知也。晚節委蛇。自食其報。較之沈范。何啻霄壤。

源按文通濟陽考城人被梁高祖知遇軍書表記嘗使其草歷官至散騎常侍左衛將軍封臨沮伯卒諡曰憲王志堅所云二書其人報袁叔明書末云一旦松柏被地墳壟刺天何時復能銜杯酒乎與此書大旨相同中有句云涼秋陰陰獨立閒館輕塵入戶飛鳥無迹又如方今仲秋風飛平原影色水鳥立於孤洲蒼葭變於河曲俱極悽麗

與陶隱居

太元真人

若夫能眇邈於當世則所重惟身也罕營外難者則無死地矣是以古之學者握元筌以藏領匿穎鏡於紛務凝神乎山巖之庭頤真於逸谷之津於是散髮高岫經緯我生暉暉景曜採吸五靈遊躡九道登元濯形投思絕空人事無營閉存之氣研諸妙精故能迴日薄之年反爲童嬰耳苟事累沙會交軒塞路但所守之不能曷也何試按之能停耶物物相邀觸類與患天人之眇豈時漏哉所司賞於修業所試在於不日新矣賈生近以此書來託向聲聲可謂有情然無逝我梁有似逆詐耳

蓀按通明當梁禪時遙上圖籙獻誠革命後世疵之要其遺榮謝世超然人外軼塵之槩不可誣也華陽諸頌洞參元諦世或真有神仙此書亦登真隱訣之佐乎

答虞仲書

陶宏景

栖六翮於荆枝望綺雲於青漢者有日於茲矣而春華來被草石開鮮辭動情端志交衿曲信知鄰德之談無虛往牘夫子雖迹躔朱閣而心期岱嶺豈但散髮乎高岫似將飛霜於絕谷良爲欽哉野人幸得託

形崇阜。息影長林。每對月流嘆。臨風軫慨。徒事累可豁。而髮容難待。自非齊生死於一致者。孰不心熱者乎。舉世悠悠。孰云同此。儻遇知己。相與共憂。竭來虞公。茲焉可邁。何爲栖栖。空勞鼓缶。迨及暇日。有事還童。不亦皎潔當年。而無忤前脩也。

源按宏景字通明。亦稱隱居。丹陽秣陵人。幼有異操。常以荻畫灰中學書。後得葛洪神仙傳。晝夜研尋。便有養生之志。謂人曰。仰青雲。覩白日。不爲遠矣。讀書萬餘卷。善琴棋。工草隸。齊高帝作相。引爲諸王侍讀。雖在朱門。閉影不交外物。永明十年。上表乞歸。公卿祖餞。車馬填咽。朝野榮之。曾夢佛授菩提記。名爲勝力菩薩。乃詣鄆縣阿育王塔自誓。受五大戒。梁大同二年卒。時年八十有五。諡曰貞白先生。

爲庾杲之與劉居士虬書

任 昉

自別荆南。倏將二紀。杲之牽滯形有。推遷勿保。丈人沒志外身。超然獨善。雖心路咫尺。而事阻山河。悠悠白雲。依然有道。金涼佇運。想恆納宜。冲明在衿。履候無爽。體道爲用。蹈理則和。杲之牽綴疲朽。愧心已多。訪德則山林窅然。觀道則風雲自遠。歲暮之期。指塗衡岳。神虛氣懋。無待怡和。江湖相望。安事行李。司徒竟陵王。茂於神者。言象所絕。接乎士者。遐邇所宗。鐘石非禮樂之本。纓褐豈朝野之謂。想闔投之懷。不以形體爲阻。一日通籍梁邸。親奉話言。夢想清塵。爲歲已積。以大人非羔鴈所榮。故息蒲幣之典。勝寄冥運。諒有風期之遲。君王卜居郊郭。縈帶川阜。顯不絢功。晦不標迹。從容乎人野之間。以窮二者之致。且宏護爲心。廣孚真俗。思聞繫表。共剖衆心。妙域筵山河。虛館帶川涘。實望賁然。少酬側遲。昔東平樂善。旌君大

於東閣。今王愛素。致吾子於西山。豈不盛歟。百齡飄驟。凝滯自物。千載一朝。爲仁由己。且如陵雪戒塗。非滅迹之郊。鴻鐘在御。豈銷聲之道。已標異人之迹。故有同物之勞。夫山水無情。應之以會。愛閒在我。觸目蕭條。衡岳何親。鍾嶺何薄。想宏思有在。不俟繁言。

杲之字景行。清貧自業。食惟菲葅。嘗對魏使。使問曰。百姓那得家家題門帖賣宅。答曰。朝廷旣欲埽蕩京洛。克復神州。所以家家賣宅耳。魏使縮鼻不答。

蓀按虬爲竟陵所徵。作牋辭謝。杲之此書。亦爲王而作。然本傳。杲之曾未爲竟陵官屬。惟稱當時諸王年少。不得妄接人。敕杲之及濟陽江淹。五日一詣諸王。使申游好。此書之作。殆其時乎。

源按防字彥昇。小字阿堆。樂安博昌人。杲之新野人。幼有孝行。爲尙書郎。食惟藜菲。生韭等雜菜。防嘗戲之曰。誰謂庾郎貧。食鮭常有二十七種。俱爲琅邪王儉所欽重。防居喪廬墓。哭泣之地。草爲不生。雅善屬文。尤長載筆。當世王公表奏。皆屬其具稿。梁高祖踐祚。拜黃門侍郎。遷吏部郎。御史中丞。祕書監。出爲義興新安太守。爲政清省。兒妾食麥而已。每曳杖徒行。邑郭民通詞訟。輒就路裁決。天監六年卒。諡曰敬。防不治生產。好交結。獎進士友。得其延譽者。率多升擢。故衣冠貴游。座客常滿。東海王僧孺論之。以爲過於董生揚子。樂人之樂。憂人之憂。虛往實歸。忘貧去吝。行可以勵風俗。義可以厚人倫。其見重如此。歿後。諸子流離漂盪。冬月著葛帔練裘。罕有贍卹者。

北使還與永豐侯書

劉潛

足踐寒地。身犯朔風。暮宿客亭。晨炊謁舍。飄飆辛苦。迄屆氈薌。雜種覃化。頗慕中國。兵傳李緒之法。樓擬衛律所治。而毳幙難淹。酪漿易饜。王程有限。時及玉關。射鹿胡奴。乃共歸國。刻龍漢節。還持入塞。馬銜首。嘶立故墟。人獲荀荀。歸種舊里。稚子出迎。善鄰相勞。倦握蟹螯。亟覆蝦碗。每取朱顏。略多自醉。用此終日。亦以自娛。

孫按此孝儀聘東魏還時作也。永豐侯梁蕭攜傳見周書。

源按永豐侯字智遐。梁安成王秀子。性溫裕能文。侯景亂後入魏。與瑯邪王褒等俱爲文學博士。校定經史。保定三年出爲上州刺史。以仁恕禮讓爲政。嘗至元日獄中囚繫。悉放歸家。聽三日後赴獄。主者堅執不可。攜曰。昔王長虞延見稱前史。吾雖寡德。竊懷景行。導民以信。方自今始。以之獲罪。彌所甘心。幸弗慮。諸囚荷恩感泣。並依限至。吏民稱其德化。歷官至少傅。封蔡陽郡公。卒諡曰襄。

答劉之遴借類苑書

劉峻

九冬有隙。三餘暇時。多遊書圃。代樹萱蘇。若夫采賸。鑿於湘沅。閱微言於殘竹。咀飲膏液。咀嚼英華。不知地之爲輿。天之爲蓋。靡測迴塘。莫辨輿馬。烏足以言乎。是用周流墳索。詳觀圖牒。搦管聯冊。纂茲英奇。蛩蛩之謀。止於善草。周周之計。利在銜翼。故鳩集斯文。蓋自綴其漏耳。豈冀藏之名山。播於士大夫哉。

初劉峻爲安成王戶曹參軍。使撰類苑一百二十卷。武帝惡峻。命學士撰華林類略以高之。之遴字思貞。虬之子。元帝嫉其才。密送藥殺之。乃自製誌銘。厚其賻贈。

源按峻字孝標。平原人。家貧好學。寄人廡下。自課讀書。常燎麻炬。從夕達旦。時或昏睡。薻其髮。既覺復讀。終夜不寐。其精進如此。

與宋玉山元思書

劉峻

驅馬金張之館。飛蓋許史之廬。習匡鼎之說詩。聘谷雲之雕篆。賓徒波湧。輿輪靡息。當是時也。樂可言哉。然靜思夫君。愀焉軫嘆。何則。方鑿圓枘。鉏鋸難從。翔鳥游魚。蹉跎不狎。是以賈生懷琬琰而挫翮。馮子握璵璠而鍛羽。天誕英逸。獨擅民秀。心貞筠箭。德潤珪璋。信人水鏡。一性鎔範。而荆南雅曲。高音鮮和。河西名驥。滅沒誰賞。故若先生者。進有三難。退有三樂。竊觀先生。未能鴻翔鸞起。騰霞躋漢。將由囿空桑麻。田無負郭。俛眉翕肩。以斯故爾。今賢弟賓從。抗鱗奮翼。或衣繡江塘。或鳴騶洛渚。連騎方驅。擊鐘乃食。萼跗若是。吾子復何憂哉。惟當纂兩仲之微跡。襲二疏之風流。生與漁父同嬉。死葬要離墓側。金石可碎。聲華無寂。斯道坦坦。先生幸其曷與。

爲衡山侯與婦書

何遜

昔人遨遊洛汭。會遇陽臺。神女髣髴。有如今別。雖帳前微笑。涉想猶存。而握裏餘香。從風且歛。掩屏爲疾。引領成勞。鏡想分鸞。葉悲別鶴。心如膏火。獨夜自煎。思等流波。終朝不息。始知萋萋萱草。忘憂之言不實。團團輕扇。合歡之用爲虛。路邇人遐。音塵寂絕。一日三秋。不足爲喻。弗陳往翰。寧寫款懷。遲枉瓊瑤。慰其杼軸。

源按遜字仲言東海郟人歷官尙書水部郎八歲能詩賦與彭城劉孝綽並稱世謂之何劉歿後東海王僧孺集其文爲八卷衡山侯名恭字敬範梁南平王偉子與其弟定襄侯祇俱爲簡文所賞愛嘗預東宮盛宴

與詹事江總書

陳後主

管記陸瑜奄然殞化悲傷悼惜此情何已吾生平愛好卿等所悉自以學涉儒雅不逮古人欽賢慕士是情尤篤梁室亂離天下糜沸書史殘缺禮樂崩淪晚生後學匪無牆面卓爾出羣斯人而已吾識覽雖局未曾以言議假人至於片善小才特用嗟賞況復洪識奇士此故忘言之地論其博綜子史諳究儒墨經耳無遺觸目成誦一褒一貶一激一揚語元析理披文摘句未嘗不聞者心伏聽者解頤會意相得自以爲布衣之賞吾監撫之暇事隙之辰頗用譚笑娛情棊樽間作雅篇豔什迭互鋒起每清風朗月美景良辰對羣山之參差望巨波之滉漾或翫新花時觀落葉旣聽春鳥又聆秋鴈未嘗不促膝舉觴連情發藻且代琢磨間以嘲諢俱怡耳目竝留情膝自謂百年爲速朝露可傷豈謂玉折蘭摧遽從短運爲悲爲恨當復何言遺迹餘文觸目增滋絕絃投筆恆有酸恨以卿同志聊復敘懷涕之無從言不寫意

源按陸瑜字幹玉吳郡人後主爲太子時引兼東宮管記以子集繁多命瑜抄撰未就卒太子流涕爲文祭之仍與江總此書論述其美

復王少保書

周宏讓

甚矣悲哉。此之爲別也。雲飛泥沈。金鑠蘭滅。玉音不嗣。瑤華莫因。家兄至自鎬京。致來書於窮谷。故人之跡。有如對面。開題申紙。流臉沾膝。江南燠熱。橘柚冬青。渭北沍寒。楊榆晚葉。土風氣候。各集所安。餐衛適時。寢興多福。甚善甚善。與弟分袂西陝。言反東區。雖保周陂。還依蔣徑。三荆離析。二仲不歸。麋鹿爲曹。更多悲緒。丹經在握。貧病莫諧。芝朮可求。聊因采掇。昔吾壯日。及弟富年。俱值邕熙。竝歡衡泌。南風雅操。清商妙曲。絃琴促坐。無乏夕晨。玉瀝金華。冀獲難老。不虞一旦。翻覆波瀾。吾已愒陰。弟非茂齒。禽尙之契。各在天涯。永念生平。難爲胷臆。正當視陰數箭。排愁破涕。人生樂耳。憂戚何爲。豈能遽悲次房。遊魂不反。遠傷金產。骸柩無託。但願愛玉體。珍金相保。期頤享黃髮。猶冀蒼鴈頰鯉。時傳尺素。清風朗月。俱寄相思。子淵子淵。長爲別矣。握管操觚。聲淚俱咽。

源按宏讓汝南安城人。時王褒在北周。爲太子少保。有寄梁處士宏讓書。此其覆書也。

與徐陵薦方圓書

周宏讓

吾荷朝恩。得安邱壑。身名兩泰。夫復奚言。但願沐浴堯風。遨遊舜日。安服飽食。以送餘齒。然性靈未能灰。弭其間。復須友生。言晤後來。英俊並出。方爲時生。林谷之中。鮮逢退逸。惟趙郡方圓。栖遲天目。年過強仕。不慕時榮。文史足用。學藝優敏。中歲暫游宛洛。蒙弟識異其人。方儲之允。衣冠未絕。雅奉閒逸。得性邱林。與吾朋游。積有年歲。今復同在巖壑。畢志風雲。琴按清商。詩題空谷。比幽貞道缺。考槃絕詠。賁五履二兩。爰無聞。方今公旦作輔。億兆攸賴。激貪懲競。儻自圓起。弟以撻揚佐世。水鏡求賢。脫能登此仄陋。綸言是

屬翹弓遠賁。則山谷咸勸。足令廉風復振。懦夫能立。豈不宏哉。圓若蒙此旌招。未必不鑿坏而達於廊廟之用。脫不能賁然來思。而於退讓之道。於斯爲貴。恐弟未究東川人士。聊復起余。今言吾家上宰之貴。無以微裨萬一。此舉脫復入聽。少得不負夙心。宏讓白。

宏讓。顓之族孫。與兄宏正。弟宏直。號三周。始仕不得志。隱句容茅山。朝徵不出。已而爲侯景中書侍郎。人問其故。曰。吾畏死耳。承聖中。爲國子祭酒。入陳。天嘉初。以白衣領太常光祿大夫。

與徐陵請王琳首書

朱瑒

竊以朝市遷貿。時傳骨鯁之風。歷運推移。間表忠貞之迹。故典午將滅。徐廣爲晉家遺老。當塗已謝。馬孚稱魏室忠臣。用能播美前書。垂名後世。梁故建甯公琳。洛濱餘胄。沂州舊族。立功代邸。效績中朝。當離亂之辰。總藩伯之任。爾乃輕躬殉主。以身許國。實追踪於往彥。信踵武於前修。而天厭梁德。尙思匡救。徒蘊包胥之念。終構萋宏之眚。洎王業光啟。鼎祚有歸。於是遠跡山東。寄命河北。雖經旅臣之嘆。猶懷客卿之禮。感茲知己。志此捐軀。至使身沒九原。頭行萬里。誠復馬革裹尸。遂其生平之志。原野薄體。全彼人臣之節。然身首異處。有足悲者。封樹靡立。良可愴焉。瑒早筮末僚。預參下席。荷公之吐握。感君之知遇。是用沾巾拭袂。痛可識之顏。迴腸疾首。切猶生之面。伏惟聖恩博厚。明詔爰發。赦王經之哭。許田橫之葬。瑒雖芻賤。竊亦有心。琳往莅壽陽。頗存遺愛。曾遊江左。非無舊德。比肩東閣之史。繼踵西園之賓。願歸元彼境。還塋窀穸。庶孤墳旣築。或飛銜土之燕。豐碑式樹。時留墮淚之民。近故舊王維等。已有綸牒。仰蒙制議。不遂

所陳。昔廉公告逝。卽肥川而建瑩域。孫叔云亡。仍芍陂而植楸檀。由此言之。抑有前例。不使壽春城下。惟傳報葛之人。滄洲島上。獨有悲田之士。昧死陳祚。伏待刑憲。

琳字子珩。元帝寵姬兄也。事元帝爲將。元帝忌其得衆。出之領外。魏平江陵。琳屯兵長沙。上游諸將。推爲盟主。陳武帝旣篡梁。討之反爲所敗。乃奉永嘉王莊爲梁主。齊亦遣兵爲援。兵敗。與莊同入齊。齊孝昭令鎮壽陽。陳將吳明徹攻之。被執。百姓泣而從。明徹懼爲變。殺之。傳首建康。故吏朱瑒致書於陵。陵啟陳主許之。瑒持首還淮南。瘞八公山側。尋有揚州人茅智勝等。密送喪柩達鄴。

源按琳。會稽山陰人。好武有勇略。體貌閑雅。立髮委地。雖無學業。而強記內敏。以軍功封建甯侯。歷湘衡二州刺史。又出鎮嶺南。刑罰不濫。輕財愛士。得將卒心。屢經喪亂。雅有忠義之節。北齊亦以此重之。及城破遇害。田夫野老。莫不歔歔流涕。知其誠信感物深矣。諡曰忠武。陵字孝穆。東海郟人。歷官侍中。少傅。性清簡寡營。好周急。所得祿俸。與親族共之。崇信釋教。後主在東宮。令陵講大品經義。名僧自遠雲集。目有青睛。時人以爲聰慧之相。諡曰章。荷公之吐握二語。史作降薛公之吐握。荷魏君之知遇。口氣尤合。

爲王寬與婦義安主書

伏知道

昔魚嶺逢車。芝田息駕。雖見妖淫。終成揮忽。遂使家勝陽臺。爲歡非夢。人慙蕭史。相偶成仙。輕扇初開。欣看笑靨。長眉始畫。愁對離妝。猶聞徙佩。顧長廊之未盡。尙分行幃。冀迴陌之難迴。廣攝金屏。莫令愁擁。恆

開錦幘。速望人歸。鏡臺新去。應餘落粉。熏爐未徙。定有餘煙。淚滴芳衾。錦花長溼。愁隨玉軫。琴鶴恆驚。已覺錦水丹鱗。素書稀遠。玉山青鳥。仙使難通。綵筆試操。香牋遂滿。行雲可託。夢想還勞。九重千日。詎想倡家。單枕一宵。便如蕩子。當令照影。雙來一鸞。羞鏡勿使窺窗。獨坐。姮娥笑人。

與徐僕射領軍述役僧書

釋真觀

泉亭光顯。寺釋真觀。致書領軍檀越。竊聞四衣開士。匡正法於將殞。十地高人。秉元文於已絕。能使岷山遺跡。無虧宴坐之風。祇樹餘苗。得肆經行之道。伏見今者皇華。奉宣嚴憲。絳是僧尼之類。不書之名籍者。竝令捐茲淨戒。就此黎民。去彼伽藍。歸其里閭。既普天之下。莫匪王臣。正當僂俛。恭承鞠躬。祇奉。但愚情所謂。竊或疑焉。自佛法肇興。千有餘載。流傳此地。數百年間。濟濟僧徒。一何爲盛。雖復市朝亟改。風化頻移。慧炬常明。戒香恆馥。其爲福利。難可勝言。所現靈祥。聞諸史傳。至如浮圖和上。瞻彩鄴中。高座法師。流芳鞏洛。或復昆明池內。識劫燒之餘灰。長沙寺裏。感碎身之遺陰。道開入境。仙人之星。乃出。法成去世。紺馬之瑞。爰浮。乃有青目赤髭。黃眸白足。連眉表稱。大耳傳芳。莫不定水淵澄。義峰山豎。汪汪道望。類迦葉之高蹤。肅肅威儀。似頻鞞之清行。頃年訛替。乃日澆漓。而正法洪基。猶應未殄。忽復違其本志。奪彼前心。莫不仰高殿而酸傷。辭舊房而悽楚。依依法座。重反何期。戀戀禪門。再還無日。乃非岐路。而有分袂之悲。雖異河梁。遂結言離之痛。若以不斷名籍。爲其深罪。延茲咎累。亦可哀矜。夫出俗之人。務應脩道。許其方外之禮。不拘域中之節。或有不貫名籍。無關簿領。竝皆遊方採聽。隨處利安。望利爲居。臨中告飯。或頭陀

林下。或蘭若巖阿。如此之流。甯容繼屬。若勝業不全。清禁多毀。宜應休道。此事誠然。而持犯難知。聖凡相濫。譬菴羅之果。生熟難分。雪山之藥。真偽難辨。忽使昆峯之上。玉石同焚。大澤之中。龍蛇等斃。何其惜也。吁可傷哉。又其割愛辭親。披緇剪髮。既無僕使。永絕妻奴。或老病之年。單貧之士。皆憑子弟。還相養衛。如其一朝而散。便溘死溝渠。遂有赴峻壑而投身。縊長繩而殞命。雖汨羅之痛。匹此猶輕。荒谷之悲。方斯未重。且復奇才絕學。並寄後生。聽講誦經。咸資晚秀。所以須陀得戒。猶是幼童。身子揚名。差非耆老。如斯之類。若並翻緇。恐此法門。便無紹繼。梵輪絕矣。精舍空焉。若八陣未休。四郊多壘。前房所寄。後殿斯憑。愚謂此人。殆誠無用。若必有拔距投石之能。索鐵伸鉤之力。則並從軍幕。久預長驅。儻復尙服緇衣。猶居寺宇。則是習勇心薄。樂道情深。若非衛玠之清羸。便同孟旭之浮怯。既不便弓馬。徒勞行陣。雖復身披甲冑。還想法衣。手執干戈。猶疑錫杖。必當遙聞戰鼓。色變心驚。遠望軍麾。魂飛氣懾。將恐有阻都護之威。無益貳師之勇。若謂不輸王課。靡助國儲。所以普使收其賦斂。但浮游之屬。萍迸蓬飛。散誕之流。且貧終窶。鄉里既無田宅。京師又闕主人。納履則兩踵併穿。斂襟則雙肘皆現。觀董生之百結。尙覺輕華。見顏子之一簞。便疑豐飽。求朽壤以爲藥。甯識紫丸。服糞掃而爲衣。豈逢黃絹。貨財之禮。此則無從。懷璧之愆。信哉應免。若令其在道。猶可分衛自資。遂使還民。便是餽糧莫寄。伏惟皇朝御歷。齊聖欽明。繼踵軒羲。比肩炎昊。握鏡之風。彌遠垂衣之化。方深兼復。梁棟三寶。敷宏十善。昔漢明靈感。上夢金人。晉武覆脩。纔招玉像。用今方古。彼有慙焉。或深經是護。等仙預大王。寶塔斯成。類無憂國主。明揚仄陋。信巢父之清虛。徵聘漁叟。許

嚴君之高尙。愚謂絰預今者。俛首僧尼。若已離法衣。無過道業。或常居邸肆。恆處田園。並依民例。宜從策使。如其禪誦。知解。蔬素清虛。或宣唱有功。梵聲可錄。或繕脩塋廟。建造經書。救濟在心。聽習爲務。乃至羸老之屬。貧病之流。幸於編戶。無所堪用。並許停寺。仍上僧籍。必望十城之寶。或出荆山。百步之中。時逢芳草。於是寺斷流俗之僧。衆無舖糟之客。六時翹請。常以國界爲心。三業精修。必用君王爲本。豈不幽明踴躍。人鬼欣懼。冥力護持。善緣扶助。然後二儀交泰。六氣調和。征馬息鞍。軍旗卷旆。邊荒入侍。無待丹水之師。玉帛來朝。還想稽山之集。何其樂矣。實可欣哉。儻復疆場不虞。軍資有闕。薄須費計。伏聽徵求。仰惟領軍檀越。外則探蹟典墳。內則鉤深經論。才高帷幄。寄重鹽梅。必願降意芻蕘。留心正法。微惠研詳。薄垂觀覽。如其一豪可採。深希曲爲矜論。無使蘭艾同鉏。薰蕕具翦。庶得仙人苑裏。更轉法輪。長者園中。還鋪講席。則匡維之德。比恆岱以齊高。擁護之功。似滄溟而共廣。橫此忤煩。彌增悚惕。

孫按此篇與虞通之讓昏表。頗爲一種俗調。作俑王志堅云。役僧一書。滿紙齋飯酸餽氣。大非雅士所賞。言之未免太過。茲姑存之。以備一體。婚表更入俳俗。不庸不汰矣。

與陽休之書

祖鴻勳

陽生大弟。吾比以家貧親老。時還故郡。在本縣之西界。有雕山焉。其處間遠。水石清麗。高巖四匝。良田數頃。家先有野舍於斯。而遭亂荒廢。今復經始。卽石成基。憑林起棟。蘿生映宇。泉流繞階。月松風草。綠庭綺合。日華雲實。傍沼星羅。檐下流烟。共霽氣而舒卷。園中桃李。雜椿柏而蔥蒨。時一褰裳涉澗。負杖登峰。心

悠悠以孤上。身飄飄而將逝。杳然不復自知在天地閒矣。若此者久之。乃還所住。孤坐危石。撫琴對水。獨詠山阿。舉酒望月。聽風聲以興思。聞鶴唳以動懷。企莊生之逍遙。慕尚子之清曠。首戴萌蒲。身衣縑襪。出蓺梁稻。歸奉慈親。緩步當車。無事爲貴。斯已適矣。豈必撫塵哉。而吾生旣繫名聲之韁鎖。就良工之剗劂。振佩紫臺之中。鼓袖丹墀之下。采金匱之漏簡。訪玉山之遺文。敝精神於邱墳。盡心力於河漢。摛藻期之鞶繡。發議必在馨香。茲自美耳。吾無取焉。嘗試論之。夫昆峯積玉。光澤者前毀。瑤山叢桂。芳茂者先折。是以東都有挂冕之臣。南國見捐情之士。斯豈惡梁錦好。蔬布哉。蓋欲保其七尺。終其百年耳。今弟官位旣達。聲華已遠。象由齒斃。膏用明煎。旣覽老氏谷神之談。應體留侯止足之逸。若能翻然清尚。解佩捐簪。則吾於茲山莊可辦。一得把臂入林。挂巾垂枝。攜酒登巘。舒席平山。道素志。論舊疑。訪丹法。語元書。斯亦樂矣。何必富貴乎。去矣。陽子。途乖趣別。緬尋此旨。杳若天漢。已矣哉。書不盡意。

鴻勳涿郡人。臨淮王彧薦其文學。除奉朝請。竟不詣謝。人怪之。曰。爲國舉才。臨淮之務。祖鴻勳何謝焉。或聞而喜。

源按北齊書鴻勳本傳。後出爲高陽太守。居官清素。妻子不免寒餒。時議高之。休之。字子烈。北平無終人。勤學多識。博綜經史。爲士友所稱。鴻勳爲司徒法曹參軍。轉廷尉正。去官歸里時。與休之此書。

上牛宏書

竊以毒螫膚。則申旦不寐。飢寒切體。亦卒歲無聊。何則。痛苦難安。貧窮易感。況懷抱之內。水火燦脂膏。

王孝籍

賤理之閒。風霜侵骨髓。安可齶舌絨脣。吞聲飲氣。惡呻吟之響。忍酸辛之酷哉。惟明公尙書。動哀矜之色。開寬裕之懷。咳唾足以濟活。枯鱗吹噓。可以騰飛。窮羽芬以椒蘭之氣。暖以布帛之詞。許小人之請。開大君子之聽。雖復山川不遠。神明在茲。信而有徵。言無不履。猶恐拯溺遲於援手。救緜緩於扶足。待越人之舟楫。求魯匠之雲梯。則必懸於喬樹之枝。沒於深泉之底矣。夫以一介貧人。七年直省。課役不免。慶賞不沾。賣貢禹之田。供釋之之費。有弱子之累。乏強兄之親。加以老母在堂。光陰遲暮。寒暑違侍。關山迢遙。齧臂爲期。前途邈矣。倚閭之望。朝夕已勤。謝相如之病。無官可以免。發梅福之狂。非仙所能避。愁疾甚乎厲鬼。人生異夫。金石營魂。且散。恐筮予無徵。齋恨入冥。則虛緣恩顧。此乃王稽所以致言。應候爲之不樂也。潛鬢髮之內。居眉睫之閒。子野未曾聞。離朱所不見。沈淪東觀。留滯南史。終無薦引。永同埋殯。三世不移。雖由寂寞。十年不調。實乏知己。夫不世出者。信聖明之君也。不萬一者。誠賢良之臣也。以夫不世出而逢不萬一。此小人所以爲明尙書幸也。坐人物之源。連銓衡之柄。反披狐白。不好緇衣。此小人爲明尙書不取也。昔荆玉未剖。卞和之足。百里未用。碎禽息之首。居得言之地。有用能之資。增日月之明。無手足之戚。憚而不爲。孰知其解。夫官或不稱其能。士或未伸其屈。一夫竊議。語流天下。勞不見圖。安能無望。倘病未及死。往還勉念。眇窮愁之閒。矚離憂之詞。託志於前修。通心於來哲。使千載之下。哀其不遇。追咎執事。有玷清塵。則不肖之軀。死生爲累。小人之罪。方且未成。願少加矜愍。留心無忽。

孝籍平原人。開皇中。召入祕書。助王劭修國史。劭不之禮。在省數年。不免輸稅。孝籍不得志。奏記于宏。

宏亦知其有學業。而竟不調。後歸。教授終于家。

牛宏字里仁。封奇章郡公。

蓀按此種文。乃有唐溫庭筠、羅隱。上達官諸啓之先聲。至朱灣、龍門轉深、玉粟轉貴之句。而遊士流風益下矣。

源按里仁。安定鶉觚人。隋開皇初。授祕書監。以典籍遺逸。上表請開獻書之路。其在吏部。先德行。後文才。凡所進用。並多稱職。卒諡曰憲。

寄梁處士周宏讓書

王褒

嗣宗窮塗。楊朱歧路。征蓬長逝。流水不歸。舒慘殊方。炎涼異節。木皮春厚。桂樹冬榮。想攝衛惟宜。動靜多豫。賢兄入關。敬承款曲。猶依杜陵之水。尙保池陽之田。鏗跡幽蹊。銷聲窮谷。何其愉樂。幸甚幸甚。弟昔因多疾。亟覽九仙之方。晚步世途。常懷五嶽之舉。同夫關令。物色異人。譬彼客卿。服膺高士。上經說道。屢聽元牝之談。中藥養人。每稟丹沙之說。頃年事逾盡。容髮衰謝。芸其黃矣。零落無時。還念生涯。繁憂總集。視陰愒日。猶趙孟之徂年。負杖行吟。同劉琨之積慘。河陽北臨。空思鞏縣。霸陵南望。還見長安。所冀書生之魂。來依舊壤。射聲之鬼。無恨他鄉。白雲在天。長離別矣。會見之期。邈無日矣。援筆攬紙。龍鐘橫集。褒字子淵。仕梁位至端右。後與元帝同降於周。與庾信齊名。初褒與梁處士周宏讓相善。及兄宏正。自陳來聘。高祖許褒通親知音。問。遂致宏讓書并詩。

遺崔隋書

隋豫章王暕

昔漢氏西京。梁王建國。平臺東苑。慕義如林。馬卿辭武騎之官。枚乘罷宏農之守。每覽史傳。嘗竊怪之。何乃脫略官榮。棲遲藩邸。以今望古。方知雅志。彼二子者。豈徒然哉。足下博聞強記。鉤深致遠。視漢臣之三。僎似涉蒙山。對梁相之五車。若吞雲夢。吾兄欽賢重士。敬愛忘疲。先築郭隗之宮。常置穆生之醴。今者重開土宇。更誓山河。地方七百。牢籠曲阜。城兼七十。包舉臨淄。大啓南陽。方開東閣。想得奉飛蓋。曳長裾。籍璫筵。躡朱履。歌山桂之偃蹇。賦池竹之檀欒。其崇貴也如彼。其風流也如此。幸甚幸甚。何樂如之。高視上京。有懷德祖。才謝天人。多慙子建。書不盡意。甯俟繁詞。

豫章王者。煬帝子齊王暕。先封豫章王也。品外錄。以爲齊豫章王嶷大誤。

暕。小字阿孩。元德太子薨。朝野以暕當嗣。帝以他事怒暕。暕寵衰。帝每慮暕生變化。及作亂。帝顧蕭后曰。得非阿孩也。化及復令人殺暕。暕亦謂出帝意。至死竟不知殺者爲誰。

源按。隋字祖濬。博陵安平人。爲河南豫章二王侍讀。及河南爲晉王。轉記室參軍。去豫章王。因遺此書。

答豫章王書

崔 隋

一昨伏奉教書。榮貺非恆。心靈自失。若乃理高象繫。管輅思而不解。事富山海。郭璞注而未詳。至於五色相宣。八音繁會。鳳鳴不足喻。龍章莫之比。吳札之論周頌。詎盡揄揚。郢客之奏陽春。誰能赴節。伏惟令王殿下。稟潤天潢。承輝日觀。雅道邁於東平。文藝高於北海。漢則馬遷蕭望。晉則裴楷張華。雞樹騰聲。鷓池

播美。望我清塵。悠然路絕。祖濬燕南。贅客河朔。惰游本無意於希顏。豈有心於慕蘭。未嘗聚螢映雪。懸頭刺股。讀論唯取一篇。披莊不過盈尺。況復桑榆漸暮。藜藿屢空。舉燭無成。穿楊盡棄。但以燕求馬首。薛養雞鳴。謬齒鴻儀。虛班驥阜。挾太山而超海。比報德而非難。堙崑崙以爲池。匹酬恩而反易。忽屬周桐錫瑞。唐水承家。門有將相。樹宜桃李。真龍將下。誰好有名。濫吹先逃。何須別聽。但慈旨抑揚。損上益下。江海所以稱王。丘陵爲之不逮。曹植儻豫聞高論。則不殞令名。楊修若竊在下風。亦詎虧淳德。無任荷戴之至。謹奉啓以聞。

蓀按蹟與父廓俱列隱逸。所著詞賦碑志十餘萬言。洽聞志七卷。四科志三十卷。江都傾覆。咸爲煨燼。此特其威鳳一羽耳。

爲侯景叛移梁朝文

魏收

夫化成萬物。分界九道。紀之以山河。照之以日月。方足圓首。含氣呈形。咸總之於聖人。畢會之以朝市。皇魏應銜甲之祕圓。納封金之寶命。萬方爲宅。四海爲家。卜世靈長。將踰八百。天壤之間。朝不別焉。惟夫三江五湖。九蠻百濮。其地如掌。人鳥不分。瞻星昧環拱之方。託水迷朝宗之義。積蠅爲衆。長蛇稱長。石田無菽粟之用。衆人非聲教所孚。是以年歷三僞。棄而不有。豈力不足。蓋所未徵。而陸梁塗泥。時軼疆鄙。天討所遺。理存惡殺。自二紀及茲。中原多故。未清區宇。文武兼勤。偃伯歸戰。有懷勞止。將令動植。俱仰堯心。遂冠蓋括途。象胥提告。推誠蹶然。類識王道。授衣禮節。拜首歸仁。舞戚所以爲高。止戈故能稱大。方知夙沙

交臂不待兵車。有苗納款。未勞征伐。而庸夫爲善。希能令終。狂人克念。更知徒語。聞利無匹夫之信。好虐有助鬼之心。白頭爲賊。曾莫自揆。嘉文浮功。甘於苟得。罔顧榆次之禍。詎識江浦之禽。侯景一豎。微蔑民斯下矣。人倫士操。本自不偷。直以少從羈勒。頗習趨走。叨忝名器。事出爾朱。藏情諂笑。唯利是視。義兵同舉。羣胡覆族。雖狐祭首丘。事非小人。而忘恩背本。景爲先至。不義不信。自此可知。但丁公之戮。時有未可也。大澤深山。龍蛇並育。遂容其悔。非棄其瑕穢。任以將率。授以兵符。庶其被鞍銜鍊。盡力馳驟。指蹤投繯。鴛兔或擒。而弱才負重。折足是慮。置之不爭之地。虛出韓鄭之間。曾無戰伐之勤。可言摧陷之績。歲往年徂。率無可紀。而腹心羣小。信納逋亡。劫奪行道。侵掠民庶。流聲遠聞。王法有典。驄馬將出。朱筆且行。自貽伊戚。了不知咎。盜憎主人。乃圖逆節。拔本塞源。委身賦虜。逼脇居民。翻蕩城池。又手曲躬。千里唯諾。殘賊相依。忻同鱗水。寵以大位。屬以東方。外曰臣主。內深骨肉。安危契闊。約以死生。拯其鼎鑊之命。全其齏粉之福。時不暇浹。翻然易慮。還相掩擊。事劇仇讐。反覆剽獲。莫非此類。至於老母暮倚。少弟升岡。妻望行夫。子號出父。食毛之屬。可爲痛心哉。景忽之如草芥。棄之如塵垢。任其斲截之誅。安其烹斬之痛。放麀食子。有似可親。觀臧窮否。恥其並主。獸心人而革裔同讐。歸家懼執法之刑。赴賊及噬臍之釁。首領無地。進退數窮。遂騁邪說。自託左右。苟有君子。義均逐雀。而彼方上下。樂禍好亂。叛竊之豎。獲毒之人。圖浮芥之小利。忘邱山之大禍。乃崇飾土偶。被以元黃。馳馬高蓋。載驥爲重。委以專征。施其爪角。驅逼子姓。率我叛亡。逼厭虐之侶。鞠苦後之衆。蟻攢蚋集。侵竊邊鄙。恤患分災。本不要於違僻。違衆悖禮。蓋神明之所誅。皇帝

垂旒華士。則天而動。卷覆三古。懷佩百王。掌握中道。崇基增構。殊塗全會。百慮一歸。中外禔福。戎華俱庇。持秋霜夏震之威。以拔山超海之力。顧指則風雲總至。迴眸而山嶽削平。雖復旗鼓所臨。有征無戰。猶以師出而服。辱在我世。所務者息民。所存者文德。豈復以擒將威敵。漂杵溺驂。爲功於一時。示武於千載。且天生五材。有聞前古。禍非我貽。其德已乎。遂置壇命將。持柯畢禮。引營就道。分途競馳。批熊舉輪之士。翹關扛鼎之卒。被組橫矛。執戈挺劍。龍駒並躍。驥子千羣。沸聒天壤。蒸鬱雲霄。一朝指揮。倏忽千里。候騎羅絡。聊逞前驅。天兵之鼓未鳴。衆軍之旗詎接。而荆揚烏合。一朝崩解。塞州滿埜。讎耳截鼻。以千萬計。不可勝數。宗親節將。咸見擒束。委命軍吏。憂在釁鼓。楚兵吳甲。積若山丘。青鵠赤烏。噎流斷岸。千金之貴。爲我資焉。痛辱可哀。其利安在。覆師喪族。禍本可尋。方之噬臍。悔之靡及。皆侯景叛戾。虛相陷誘。指成提挈之舉。終無犄角之勢。景棄本趨末。背國違命。部下數千。屈逼羅網。離親懷士。一日三秋。拘網立匏。朝不謀夕。豈能搖足東上。遠赴彭城。天奪彼魄。信納虛詭。使蕭明貴孫。面縛於徐泗。景爲凶藪。逡巡而坐。觀託人七尺之身。居人成敗之地。急病讓醫。固若此也。兩端自見。故態未除。今知東南滌蕩。睢潼清復。梁之喪師。單輪不返。繫援之期。終當無日。勢窮路盡。憂在滅亡。事留變生。將謀及已。且彼軍殲殄。江淮屠酷。禍源釁迹。景實啓之。上懼金陵君長。致請設之責。下恐荆吳子弟。洗父兄之冤。愚小猜驚。將興異計。乘專任之機。藉方面之重。定當招結。僮扇合無賴。內自封植。外絕防禦。因見信而類起。出不疑以竊發。事比疾雷。理同激矢。上或憑陵乘疾。專擅縱橫。下則鴟峙淮淝。覬覦叛渙。老疾姦回。不虛然也。而彼士區區。厚加崇納。置

之襟帶之方。處以藩衛之所。費金帛於烈火。馨酒漿於漏卮。非乘景虛聲。委其實用。夫量材授任。必原其始。考行責成。當存其大。景豺聲蜂目之首。狼心狐魅之徒。義無父子。棄同卽異。捐親背德。於我尙反目而去。在梁則何施可懷。且我重傷心。尾大不掉。魚脫於淵。義彰老氏。而假威凶險。授柄姦回。欲求肝膽之誠。更啓危亡之兆。固智者不爲。迷者遂去。若抽薪止沸。翦草除根。壺首囊頭。叉手械足。返國姦於司敗。歸侵地於元武。非直惡之在今。天道人事。實棄無禮。苟違之者。其長世何。若悔非知罪。恭承德音。且欲飛驛合符。班師凱入。悠悠水鄉。有救其死。若乃執飾非之辨。固遂過之失。便當盡常勝之戰。極必取之功。飛江南渡深山。將恐削壤卑名。雖頓顙而不獲。亡宗滅廟。望喬木而可悲。昔田假英人。於期壯士。窮而歸我。許以入懷。景竦悖狗子。攪亂四國。庸可紓難。棄若孤鷁。何足戀戀於亂臣。勤勤於賊子也。王者之威心厲如霜。雪。信同寒暑。言猶麗天。移至深念變通。熟量可否。幸思大雅。無貽復悔。

蓀按祖君彥檄隋文。較此便意致相懸。然變六朝而古音未歇者。畢竟推唐代諸公。非宋元人可及也。源按收字伯起。小字佛助。鉅鹿下曲陽人。少折節讀書。夏日坐板牀。隨樹陰諷誦。積年不稍輟。史稱收爲此檄。初夜執筆。三更便成。宜其通達縱橫敏捷如此。心厲句疑有誤。

報應問

何承天

西方說報應。其枝末雖明。而卽本常昧。其言奢而寡要。其譬迂而無徵。乖背五經。故見棄於先聖。誘掖近情。故得信於季俗。夫欲知日月之行。故假察於璇璣。將申幽冥之信。宜取符於見事。故鑑燧懸而水火降。

雨宿離而風雲作。斯皆遠繇近驗。幽以顯著者也。夫鵝之爲禽。浮清池。咀春草。衆生蠢動。弗之犯也。而庖人執焉。尠有得免刀俎者。燕鷗翔求食。唯飛蟲是甘。而人皆愛之。雖巢幕而不懼。非直鵝燕也。羣生萬有。往往如之。是知殺生者無惡報。爲福者無善應。所以爲訓者如彼。所以示世者如此。余甚惑之。若謂燕非蟲不甘。故罪所不及。民食芻豢。奚獨嬰辜。若謂禽豕無知。而人識經教。斯則未有經教之時。畋漁網罟。亦無罪也。無故以科法入中國。乃所以爲民陷穿也。彼仁人者。豈其然哉。故余謂佛經。但是假設。權教勸人爲善耳。無關實敍。是以聖人作制。推德翳物。我將我享。實膺天祐。田獲三品。賓庖豫焉。若乃見生不忍死。聞聲不食肉。固君子之所務也。竊願高明更加三思。

源按承天東海郟人博覽古今多才藝一時所推甚爲宋文帝敬禮累官御史中丞將遷坐漏密旨免官。

問律自序

張 融

吾文章之體多爲世人所驚。汝可師耳以心。不可使耳爲心師也。夫文豈有常體。但以有體爲常。政當使常有其體。丈夫常刪詩書。制禮樂。何至因循。寄人籬下。且中代之文。道體闕變。尺寸相資。彌縫舊物。吾之文章。體亦何異。何嘗顛溫涼而錯寒暑。綜哀樂而橫歌哭哉。政以屬辭多出。比事不羈。不阡不陌。非途非路耳。然其傳音振逸。鳴節竦韻。或當未極。亦已極其所矣。汝若復別得體者。吾不拘也。吾義亦如文。造次乘我。顛沛非物。吾無師無友。不文不句。頗有孤神獨逸耳。義之爲用。將使性入清波。塵洗猶沐。無得釣聲。

同利舉價如高。俾是道場。險成軍路。吾昔嗜僧言。多肆法辯。此盡遊乎言笑。而汝等無幸。又云。人生之口。正可論道說義。惟飲與食。此外如樹網焉。吾每以不爾爲恨。爾曹當振網也。

源按釋文義。似汝等無幸句。自序已完。又云以下。是史臣連綴之辭。

爲亮法師製涅槃經疏序

武帝

曰非言無以寄言。言卽無言之累。累言則可以息言。言息則諸見競起。所以如來乘本願以託生。現慈力以應化。離文字以設教。忘心相以通道。欲使珉玉異價。涇渭分流。制六師而正四倒。反八邪而歸一味。折世智之角。杜異人之口。導求珠之心。開觀象之目。救燒灼於火宅。振沈溺於浪海。故法雨降而焦種更榮。慧日升而長夜蒙曉。發迦葉之悱憤。吐真實之誠言。雖復二施等於前。五大陳於後。三十四問。參差異辯。方便勸引。各隨意答。舉要論經。不出兩塗。佛性開其本有之源。涅槃明其歸極之宗。非因非果。不起不作。義高萬善。事絕百非。空空不能測其真隆。元元不能窮其妙門。自非德均平等。心答無生。金牆玉屋。豈易入哉。

蓀按蕭梁諸君。多通內典。故言之豐豐。乃爾。然如金剛摩訶懺。及斷酒肉文。殊近庸猥。不及此文雅令。

陶淵明集序

昭明太子

夫自銜自媒者。士女之醜行。不伎不求者。明達之用心。是以聖人韜光。賢人遁世。其故何也。含德之至。莫踰於道。親己之切。無重於身。故道存而身安。道亡而身害。處百齡之內。居一世之中。倏忽比之白駒。寄寓

謂之逆旅。宜乎與大塊而盈虛。隨中和而任放。豈能戚戚勞於憂畏。汲汲役於人間。齊謳趙女之娛。八珍九鼎之食。結駟連騎之榮。侈袂執圭之貴。樂既樂矣。憂亦隨之。何倚伏之難量。亦慶弔之相及。智者賢人居之甚。履薄冰。愚夫貪士。競之若洩尾閭。玉之在山。以見珍而終破。蘭之生谷。雖無人而自芳。故莊周垂釣於濠。伯成躬耕於野。或貨海東之藥草。或紡江南之落毛。譬彼鷓鴣。豈競鳶鷂之肉。猶斯雜縣。甯勞文仲之牲。至於子常甯喜之倫。蘇秦衛鞅之匹。死之而不疑。甘之而不悔。主父偃言。生不食五鼎。死則五鼎烹。卒如其言。豈不痛哉。又楚子觀周。受折於孫滿。霍侯驂乘。禍起於負芒。饕餮之徒。其流甚衆。唐堯四海之主。而有汾陽之心。子晉天下之儲。而有洛賓之志。輕之若脫屣。視之若鴻毛。而況於他人乎。是以至人達士。因以晦迹。或懷螯而謁帝。或被褐而負薪。鼓枻清潭。棄機漢曲。情不在於衆事。寄衆事以忘情者也。有疑陶淵明詩。篇篇有酒。吾觀其意。不在酒。亦寄酒爲迹者也。其文章不羣。詞彩精拔。跌宕昭彰。獨超衆類。抑揚爽朗。莫之與京。橫素波而傍流。干青雲而直上。語時事則指而可想。論懷抱則曠而且真。加以貞志不休。安道苦節。不以躬畊爲恥。不以無財爲病。自非大賢篤志。與道汗隆。孰能如此乎。余素愛其文。不能釋手。尙想其德。恨不同時。故加搜校。粗爲區目。白璧微瑕。惟在閒情一賦。揚雄所謂勸百而諷一者。卒無諷諫。何足搖其筆端。惜哉。亡是可也。并粗點定其傳。編之於錄。嘗謂有能觀淵明之文者。馳競之情。遺鄙吝之意。祛貪夫可以廉。懦夫可以立。豈止仁義可蹈。抑乃爵祿可辭。不必傍游泰遠。求柱史。此亦有助於風教也。

內典碑銘集林序

梁元帝

夫法性空寂。心行處斷。感而遂通。隨方引接。故鵠園善誘。馬苑宏宣。白林將謝。青樹已列。是宣金牒。方寄銀身。自象教東流。化行南國。吳主至誠。歷七霄而光曜。晉王畫像。經五帝而彌新。次道孝伯。嘉賓元度。斯數子者。亦一代名人。或修理止於伽藍。或歸心盡於談論。銘頌所稱。興公而已。夫披文相質。博約溫潤。吾聞斯語。未見其人。班固碩學。尙云讚頌相似。陸機鉤深。猶聞碑賦如一。唯伯喈作銘。林宗無媿。德祖能誦。元常善書。一時之盛。莫得係踵。況般若元淵。真如妙密。觸言成累。係境非真。金石何書。銘頌誰闡。然建塔紀功。招提立寺。或興造有由。或誓願所記。故鑄之立石。傳諸不朽。亦有息心應供。是曰桑門。或謂智囊。或稱印手。高座擅名。預伊師之席。道林見重。陪飛龍之座。峨眉廬阜之賢。鄴中宛鄧之哲。昭哉史冊。可得而詳。故碑文之興。斯焉尙矣。夫世代亟改。論文之理。非一時事推移。屬詞之體。或異。但繁則傷弱。率則恨省。存華則失體。從實則無味。或引事雖博。其意猶同。或新意雖奇。無所倚約。或首尾倫帖。事似牽課。或闕復博涉。體製不工。能使豔而不華。質而不野。博而不繁。省而不率。文而有質。約而能潤。事隨意轉。理逐言深。所謂菁華。無以閒也。予幼好雕蟲。長而彌篤。遊心釋典。寓目詞林。頃常搜聚。有懷著述。譬諸法海。無讓波瀾。亦等須彌。同歸一色。故不擇高卑。唯能是與。尙未詳悉。隨而足之。名爲內典碑銘集林。合三十卷。庶將來君子。或裨觀見焉。

蓀按本紀載元帝所著書十餘種。有內典博要一百卷。而無碑銘集林一書。豈卽在博要百卷中乎。他

日當再考之。

職貢圖序

梁元帝

竊聞職方氏掌天下之圖。四夷八蠻。七閩九貉。其所由來久矣。漢氏以來。南羌旅距。西域憑陵。創金城。開玉關。絕夜郎。討日逐。觀犀甲。則建朱崖。聞蒲萄。則通大宛。以德懷遠。異乎是哉。皇帝君臨天下之四十載。垂衣裳而賴兆民。坐巖廊而彰萬國。梯山航海。交臂屈膝。占雲望日。重譯至焉。自塞以西。萬八千里。路之狹者。尺有六寸。高山尋雲。深谷絕景。雪無冬夏。與白雲而共色。冰無早晚。與素石而俱貞。踰空桑而歷昆吾。度青丘而跨丹穴。炎風弱水。不革其心。身熱頭痛。不改其節。故以明珠翠羽之珍。細而弗有。龍文汗血之驥。却而不乘。尼邱乃聖。猶有圖人之法。晉帝君臨。實聞樂賢之象。甘泉寫闕氏之形。後宮玩單于之圖。臣以不佞。推轂上游。夷歌成章。胡人遙集。款開蹶角。沿泝荆門。瞻其容貌。訴其風俗。如有來朝京輦。不涉漢南。別加訪採。以廣聞見。名爲貢職圖云爾。

全德志序

梁元帝

老子言全德歸厚。莊周云全德不刑。呂覽稱全德之人。故以全德創其名也。此志隆大夫爲首。伊人有學。有辯。不天不貧。寶劍在前。鼓瑟從後。連環炙輶。雍容卒歲。駟馬高車。優遊宴喜。旣令公侯踞掌。復使要荒蹶角。入室生光。豈非盛矣。若乃河宗九策。事等神鉤。陽雍雙璧。理歸元感。南陽樊重。高閣連雲。北海公沙。門人成市。咨此人龍。各傳一藝。夾河兩郡。家有萬石。人生行樂。止足爲先。但使樽酒不空。坐客恆滿。甯與

孟嘗聞琴承睫淚下。中山聽樂悲不自禁。同年而語也。

洞林序

梁元帝

蓋聞元枵之野。鬼方難測。朱鳥之舍。神道莫知。而緹幔曉披。旣辯黃鍾之氣。靈臺夕望。便知玉井之色。復以談乎天者。雖絕名言之外。存乎我者。還居稱謂之中。余幼學星文。多歷歲稔。海中之書。略皆尋究。巫咸之說。徧得研求。雖紫微迢遞。如觀掌握。青龍顯晦。易乎窺覽。羨門五將。亟經玩習。韓終六壬。常所寶愛。至如周王白雉之筮。殷人飛燕之卜。著名聚雪。非關地極之山。卦有密雲。能擁西郊之氣。爻通七聖。世經三古。山陽王氏。真解談元。河東郭生。纔能射覆。兼而兩之。竊自許矣。

昭明太子集序

王孝綽

臣竊觀大易。重明之象著焉。抑又聞之。匕鬯之義存焉。故書有孟侯之名。記表元良之德。歷選前古。以洎夏周。可得而稱。啓誦而已。雖徹聖挺賢。光乎二代。高文精義。閔爾無聞。漢之顯宗。晉之肅祖。昔自春宮。益好儒術。或專經止於區易。或持論窮於貞假。子桓雖擣藻銅省。集講肅成。事在藩儲。理非皇貳。未有正位少陽。多才多藝者也。粵我大梁之二十一載。盛德備乎東朝。若乃有縱自天。惟睿作聖。顯仁立孝。行於四海。如珪如璋。不因琢磨之義。爲臣爲子。寧待觀喻之言。惟性道難聞。而文章可見。故俯同志學。用晦生知。以弦誦之餘辰。總鄒魯之儒墨。徧綈紉於七閭。彈竹素於九流。地居上嗣。實副元首。皇帝垂拱巖廊。委成庶績。時非從守。事或監撫。雖一日二日。攝覽萬幾。猶臨書幌而不休。對欵案而忘怠。況復延納侍講。討論

經紀去聖滋遠。愈生穿鑿。枝分葉散。殊路僭馳。靈臺辟雍之疑。禮祀祭社之繆。明章申老之議。通顏理王之說。量覈然否。剖析同異。察言抗論。窮理盡微。於時淹中稷下之生。金華石渠之士。莫不過衢樽而挹多。少見斗極而曉西東。與夫盡春卿之道。贊仲尼之宅。非賈誼於蘇林。問蕭何於棗據。區區前史。不亦慙歟。加以學貫總持。辨同無破。五時密教。見猶鏡象。一乘妙旨。觀若掌珠。及在布金之園。處如龍之衆。開示有空顯揚權實。是以徧動六地。普雨四花。豈直得解櫻須提。舍鉢瓶沙。騰曇言德。梵志依風而已哉。若夫天文以爛然爲美。人文以煥乎爲貴。是以隆儒雅之大成。遊雕蟲之小道。握牘持筆。思若有神。曾不斯須。風飛雷起。至於宴遊西園。祖道清洛。三百載賦。該極連篇。七言致擬。見諸文學。博逸興詠。並命從遊。書令視草。銘非潤色。七窮焯燁之說。表極遠大之才。皆喻不備體。詞不掩義。因宜適變。曲盡文情。竊以屬文之體。鮮能周備。長卿徒善。旣累爲遲。少孺雖疾。俳優而已。子淵淫靡。若女工之蠹。子雲侈靡。異詩人之則。孔璋詞賦。曹祖勸其修今。伯喈笑贈。摯虞知其頗古。孟堅之頌。尙有似讚之譏。士衡之碑。猶聞類賦之貶。深乎文者。兼而善之。能使典而不桎。遠而不放。麗而不淫。約而不儉。獨擅衆美。斯文在斯。假使王郎報箋。卞蘭獻頌。猶不足以揄揚著述。稱贊才章。況在庸才。曾何彷彿。然承華肇建。濫齒時髦。居陪出從。逝將二紀。譬彼登山。徒仰峻極。同夫觀海。莫澄波瀾。但職官書記。預聞盛藻。歌詠不足。敢忘編次。謹爲一帙十卷。第目如左。日升松茂。與天地而偕長。壯思英詞。隨歲月而增廣。如其後錄。以俟賢臣。

蓀按孝綽被禮昭明時作樂賢堂使畫工先圖其像太子文章繁富羣才咸欲撰錄太子獨使孝綽集

而序之。至於焚到氏之書。改少姝之奏。君臣寵遇古少。其倫卒以陵忽忤時。擢抑沒世。生平文集數十萬言。今傳者寥寥無幾。文人類不護細行。亦其才氣有以致之也。噫。

源按。孝綽本名冉。小字阿土。彭城安上里人。父繪仕齊。掌詔誥。孝綽年十四。繪常使代草之。少負盛名。天才仗氣。有不合意。輒極言詆訾。凡遇朝會。公卿間無所語。反呼驕卒訪道途間事。其忤物遭忌。有以哉。

詩品序

鍾鏐

氣之動物。物之感人。故搖蕩性情。形諸舞詠。照燭三才。暉麗萬有。靈祇待之以致饗。幽微藉之以昭告。動天地。感鬼神。莫近於詩。昔南風之辭。卿雲之頌。厥義夔矣。夏歌曰。鬱陶乎予心。楚謠曰。名予曰正。則雖詩體未全。然是五言之濫觴也。逮漢李陵。始著五言之目矣。古詩眇邈。人代難詳。推其文體。固是炎漢之製。非衰周之倡也。自王揚枚馬之徒。詞賦競爽。而吟咏靡聞。從李都尉迄班婕妤。將百年間。有婦人焉。一人而已。詩人之風。頓已缺喪。東京二百載中。惟有班固詠史。質木無文。降及建安。曹公父子。篤好斯文。平原兄弟。鬱爲文棟。劉楨。王粲。爲其羽翼。次有攀龍託鳳。自致於屬車者。蓋將百計。彬彬之盛。大備於時矣。爾後陵遲衰微。迄於有晉。太康中。三張。二陸。兩潘。一左。勃爾復興。踵武前王。風流未沫。亦文章之中興也。永嘉時。貴黃老。稍尙虛談。於時篇什。理過其辭。淡乎寡味。爰及江表。微波尙傳。孫綽。許詢。桓庾。諸公。詩皆平典。似道德論。建安風力盡矣。先是郭景純。用雋上之才。創變其體。劉越石。仗清剛之氣。贊成厥美。然彼衆

我寡未能動俗。逮義熙中。謝益壽。裴然繼作。元嘉中有謝靈運。才高詞盛。富豔難蹤。固已含跨劉郭。陵轢潘左。故知陳思爲建安之傑。公幹。仲宣。爲輔。陸機爲太康之英。安仁。景陽。爲輔。謝客爲元嘉之雄。顏延年爲輔。斯皆五言之冠冕。文詞之命世也。夫四言文約義廣。取效風騷。便可多得。每苦文繁而意少。故世罕習焉。五言居文詞之要。是衆作之有滋味者也。故云會於流俗。豈不以指事造形。窮情寫物。最爲詳切者耶。故詩有六義焉。一曰興。二曰比。三曰賦。文已盡而意有餘。興也。因物喻志。比也。直書其事。寓言寫物。賦也。宏斯三義。酌而用之。幹之以風力。潤之以丹彩。使味之者無極。聞之者動心。是詩之至也。若專用比興。則患在意深。意深則詞躓。若但用賦體。則患在意浮。意浮則文散。嬉成流移。文無止泊。有蕪漫之累矣。若乃春風春鳥。秋月秋蟬。夏雲暑雨。冬月祁寒。斯四候之感諸詩者也。嘉會寄詩以親。離羣託詩以怨。至於楚臣去境。漢妾辭宮。或骨橫朔野。或魂逐飛蓬。或負戈外戍。或殺氣雄邊。塞客衣單。孀閨淚盡。文士有解佩出朝。一去忘返。女有揚蛾入寵。再盼傾國。凡斯種種。感蕩心靈。非陳詩何以展其義。非長歌何以釋其情。故曰詩可以羣。可以怨。使窮賤易安。幽居靡悶。莫尙於詩矣。故詞人作者。罔不愛好。今之士俗。斯風熾矣。纔能勝衣。甫就小學。必甘心而馳騫焉。於是庸音雜體。各爲家法。至於膏腴子弟。恥文不逮。終朝點綴。分夜呻吟。獨觀謂爲警策。衆覩終淪平鈍。次有輕蕩之徒。笑曹劉爲古拙。謂鮑昭羲皇上人。謝朓今古獨步。而師鮑昭。終不及日中市朝滿。學謝朓。劣得黃鳥度青枝。徒自棄於高聽。無涉於文流矣。嶮觀王公搢紳之士。每博論之餘。何嘗不以詩爲口實。隨其嗜欲。商榷不同。淄澠竝泛。朱紫相奪。喧譁競起。準的無依。

近彭城劉士章。俊賞之士。疾其淆亂。欲爲當世詩品。口陳標榜。其文未遂。嶸感而作焉。昔九品論人。七略裁士。校以賓實。誠多未值。至若詩之爲技。較爾可知。以類推之。殆均博奕。方今皇帝。資生知之上才。體沈鬱之幽思。文麗日月。學究天人。昔在貴遊。已爲稱首。況八紘旣掩。風靡雲蒸。抱玉者聯肩。握珠者接武。固以睨漢魏而不過。吞晉宋於胸中。諒非農歌轅議。敢致流別。嶸之今錄。庶周旋於閭里。均之於談笑耳。

源按嶸字仲偉。潁川長社人。嘗品古今五言詩。論其優劣。此其自序也。楚謠曰。曰當作云。文士有解佩出朝句。文當作又。

書品序

庾肩吾

元靜先生曰。予遍求邃古。逖訪厥初。書名起于元洛。字勢發于倉史。故遺結繩。取諸文象。諸形會諸人事。未有廣此絨滕。深茲文契。是以一書加大。天尊可知。二力增土。地卑可審。日以君道。則字勢圓。月以臣輔。則文體缺。及其轉註假借之流。指字會意之類。莫不狀範毫端。形呈字表。開篇玩古。則千載共朝。削簡傳今。則萬里對面。記善則惡自削。書賢則過必改。玉歷頌正而化俗。帝教陳言而設教。變通不極。日用無窮。與聖同功。參神並運。爰洎中葉。舍繁從省。漸失潁川之言。竟逐雲陽之字。若乃鳥跡孕于古文。壁書存于科斗。符陳帝璽。摹調蜀漆。署表宮門。銘題禮器。魚遊舍鳳。鳥已分蟲。仁義起于麒麟。威形發于龍虎。雲氣時飄五色。仙人還作兩童。龜若浮溪。蛇若赴穴。流星疑燭。垂露似珠。芝英轉車。飛白掩素。參差倒穢。旣思種柳之謠。長短懸針。復想定情之製。蚊脚傍低。鵠頭仰立。填飄板上。謬起印中。波回墮鏡之鸞。楷顧雕陵。

之鵠。並以篆籀重復。見重昔時。或巧能售酒。或妙令鬼哭。信無味之奇珍。非趨時之急務。且具錄前訓。今不復兼論。惟草正流通。專行於世。其或繼之者。雖百代可知。尋隸體。發源秦時。隸人下邳程邈所作。始皇見而重之。以奏事繁多。篆字難製。遂作此法。故曰隸書。今時正書是也。草聖起於漢時。解散隸法。用以赴急。本因草創之義。故曰草書。建初中。京兆杜操。始以善書知名。今之草書是也。余自少迄長。留心茲業。澡手謝於臨池。銳意同於削板。而蕺山之扇。竟未增華。凌雲之臺。無因誠子。求諸故迹。或有淺深。輒刪善草。隸者一百二十一人。伯英以稱聖居首。法高以追駿處末。推能相越。小例而九。引類相附。大等而三。復爲略論總名書品。

蓀按慎之。當宋子仙破會稽時。以詩免旤。而遺篇零落。論者惜焉。此與鍾仲偉詩評。固各樹一代之幟者也。

虎邱山序

顧野王

夫少室作鎮。以峻極而標奇。太華神掌。以削成而稱貴。若茲山者。高不概雲。深無藏影。卑非培塿。淺異棘林。秀壁數尋。被杜蘭與苔蘚。椿林十仞。挂藤葛與懸蘿。曲澗潺湲。修篁陰映。路若絕而復通。石將積而更綴。抑巨麗之名山。信大吳之勝壤。若乃九功六義之興。依永和聲之製。志由興作。情以詞宣。形言諸於韶夏。成文暢於鐘律。由來尙矣。未有登高能賦。而韜斐麗之章。入谷忘歸。而忽鏗鏘之節。故總轡齊鑣。競彫蟲於山川。雲合霧集。爭歌頌於林泉。於時風清邃谷。景麗修巒。蘭佩堪紉。胡繩可索。林花翻灑。乍飄颺於

蘭皋山禽囀響。時弄聲於喬木。班草班荆。坐蟠石之上。濯纓濯足。就滄浪之水。傾縹盜而酌旨酒。剪綠葉而賦新詩。肅肅若與三徑齊蹤。鏘然似共九成偕韻。盛矣哉。聊述時事。寄之翰墨。

孫按王子安山亭興序較此便多俳調。

源按野王字希馮。吳郡人。以篤學至性知名。在朝無過辭失色。觀其容貌似不能言。及其勵精力行。皆人所莫及。

河清頌有序

鮑照

臣聞善談天者。必徵象於人。工言古者。先考績於今。鴻犧以降。遐哉邈乎。鏤山岳。雕篆素。昭德垂勛。可謂多矣。而史編唐堯之功。載格於上下。樂登文王之操。稱於昭于天。素狐元玉。聿彰符命。朴牛文蠃。爰定祥歷。魚鳥動色。禾雉興讓。皆物不盈。背而美溢。金石頌聲。爲之而寢。詩人於是不作。庸非惑歟。自我皇宋之承天命也。仰符龍木之精。俯協龜水之靈。君圖帝寶。粲爛瑰英。固業光曩代。事華前德矣。聖上天飛。踐極迄茲。二十四載。道化周流。元澤汪濊。地平天成。上下含熙。文同軌通。表裏禔福。耀德中區。黎庶知讓。觀英遐表。夷貉懷惠。秩禮卹勤。散露臺之金。振民舒國。傾御邸之粟。約違迫脅。奢去甚泰。燕無留飲。畋不槃樂。物色異人。優游鯁直。顯靡失心。幽無怨魄。精炤日月。事洞天情。故不勞仗斧之使。號令不肅而自嚴。無辱鳳舉之事。靈怪不召而自彰。萬里神行。飈塵不起。農商野廬。邊城偃柝。冀馬南金。填委內府。馴象西爵。充羅外苑。阿紈纂組之饒。衣覆宗國。魚鹽杞梓之利。傍瞻荒遐。士民殷富。繁溢五陵。宮宇宏麗。崇冠山川。閭

開有盈。歌吹無絕。朱輪疊跡。華冕重肩。豈徒世無窮人。民獲休息。朝呼韓。罷酤鐵。而已哉。是以嘉祥累仍。福應尤盛。青邱之狐。丹穴之鳥。栖阿閣。遊禁園。金芝九莖。木禾六秀。銅池發。膏畝腴。宜以謁薦郊廟。和協律呂。煙霏霧集。不可勝紀。然而聖上猶夕興昧旦。若有望而未至。閔規遠圖。如有追而莫及。神明之貺。推而弗居也。是以碗碑鏐檢。盛典蕪而不治。朝神省方。大化抑而未許。崇文協律之士。蘊讎頌於外。坐朝陪宴之臣。懷揄揚於內。三靈貯睇。九壤注心。既有日矣。歲宮乾維。月纏蒼陸。長河巨濟。異源同清。澄波萬頃。潔瀾千里。斯誠曠世偉觀。昭啓皇明者也。語曰。影從表。瑞從德。此其效焉。宣尼稱鳳鳥不至。河不出圖。傳曰。俟河之清。人壽幾何。皆傷不可見也。然則古人所不見者。今殫見之矣。孟軻曰。千載一聖。是旦暮也。豈不信哉。夫四皇六帝。樹聲長世。大寶也。澤浸羣生。國富形清。鴻德也。制禮裁樂。惇風遷俗。文教也。誅垂羯黠。束頹象闕。武功也。鳴禽躍魚。滌穢河渠。至祥也。大寶鴻德。文教武功。其崇如此。幽明協養。民祇與能。厥應如彼。惟天爲大。堯實則之。皇哉唐哉。疇與爲讓。抑又聞之。勢之所覃者淺。則美之所傳者近。道之所感者深。則慶之所流者遠。是以豐功隲命。潤色滕策。盛德形容。藻被歌頌。察之上代。則奚斯吉甫之徒。鳴玉鸞於前。視之中古。則相如王褒之屬。施金羈於後。絕景揚光。清埃繼路。班固稱漢成之世。奏御者千有餘篇。文章之盛。與三代同風。由是言之。斯乃臣子舊職。國家通義。不可輟也。臣雖不敏。寧不勉乎。乃作頌曰。窺刊崩石。摺逸殘竹。巢風寂寥。羲埃綿邈。鉅生大年。瞻學淵聞。整繡成景。粉績顯軒。徒翫井科。未睹天河。亘古通今。明鮮晦多。千齡一見。書史登歌。旋我皇駕。揆景方塗。凌周躡殷。蹶唐轢虞。如彼七緯。累璧重珠。

高祖撥亂首物定靈。更開天地再鑄羣生。帝御三極。龍步八垌。朔南暨教。海北騰聲。淪深格高。浹遐洞冥。
鑾鼎遷宋。元圭告成。大明方徽。鴻光中微。聖命誰堪。皇歷攸歸。謀從筮協。神與民推。黃旗西映。紫蓋東輝。
納瑞螭玉。升政衡機。金輪豹飾。珠冕龍衣。正位北辰。垂拱南面。天下何思。日用罔倦。復禮歸仁。觀恆通變。
一物有違。戚言毀膳。菲躬簡法。厚下安宅。謙德彌光。損道滋益。孝崇饗祀。勤隆畊籍。饘耐秋羊。封瑾春幣。
嬰髦兼梁。鰥孤重帛。體由學染。俗以教遷。禮導形清。樂鬯風宣。分衢讓齒。折訟推田。野旌伏彥。朝賞登賢。
儒順優柔。武節森鷲。文憲精宏。戎容犀利。樞鈐明密。程彊周備。吏礪平端。民羞幸覬。桴鼓凝埃。烽驛垂轡。
銷我長劍。歸爲農器。閩外水鄉。彰表炎國。隴首西南。渤海東北。艷艷嶺丹。渾渾泉黑。移琛雲勉。轉隼叩熒。
狼歌薦功。鳥談成德。治博化光。民阜財盛。斑白行謠。青綺高詠。雲表幽和。物章明慶。麗物雕質。蠢行藻性。
仁草晨葦。德宿宵映。海無隱飈。山有黃落。牛羊內首。閭戶外拓。瑞木朋生。祥禽輩作。薰風蕩閨。飴露漳閣。
器範神妙。劑調象藥。匪直也斯。偉慶芳漆。注彼四瀆。媚此雙川。伏靈遙紀。闕祝遐年。澄波海嶽。鏡流蔥山。
泉室凝澱。水府清涓。俛瞰夷都。降眦驪淵。朱宮潛耀。紫閣陰鮮。昔在爽德。王風不昌。迺溢迺竭。或壅或亡。
潔源濫壑。曾是未央。先民永慨。大道悠長。云何其瑞。實鍾我皇。聞諸師說。天竦聽密。介焉如嚮。匪遠惟疾。
矧是皇心。妙夫貞一。左右天經。戶牖人術。訐謨布簡。絲言盈室。歲有綿祀。清豈崇日。一人之慶。吹萬秉和。
靈根方固。修源重波。副睿貳哲。帝體皇柯。景雲蔚嶽。秀星駢羅。垂光九野。騰響四遐。輔居鼎足。槃石虎牙。
世匹周室。基永漢家。泰階旣平。清河旣清。大夫在上。區宇文明。樵夫議道。漁父濯纓。臣照作頌。鋪德樹聲。

照字明遠。東海人。宋元嘉中。河濟俱清。照爲此頌。

照或作昭。後人避武后諱。故今宜改正。

源按明遠。宋孝武時。爲中書舍人。上好爲文章。自謂物莫能及。照悟其旨。爲文多鄙辭。當時以爲才盡。

勞生論有引

盧思道

莊子曰。大塊勞我以生。誠哉斯言也。余年五十。羸老云至。追惟疇昔。勤矣厥生。乃著茲論。因言時云爾。罷郡屏居。有客造余者。少選之頃。盱衡而言曰。生者天地之大德。人者有生之最靈。所以作配兩儀。稱貴羣品。妍媸愚智之辯。天懸壤隔。行己立身之異。入海登山。今吾子生于右地。九葉卿族。天授俊才。萬夫所仰。學綜流略。慕孔門之游夏。辭窮麗則。擬漢日之卿雲。行藏有節。進退以禮。不諂不驕。無慍無懣。偃仰貴賤之間。從容語默之際。何其裕也。下走所欣羨焉。余莞爾而笑曰。未之思乎。何所言之過也。子其清耳。請爲左右陳之。夫人之生也。皆未若無生。在余之生。勞亦勤止。紈綺之年。伏膺教義。規行矩步。從善而登。巾冠之後。濯纓受署。纒鑠仁義。籠絆朝市。失翹陸之本性。喪江湖之遠情。淪此風波。溺于倒躓。憂勞總至。事非一緒。何則。地胄高華。旣致嫌于管庫。才識美茂。亦受嫉于愚庸。篤學強記。聳瞽于焉側目。清言河瀉。木訥所以疾心。豈徒蠱惜春漿。鷓鴣腐鼠。相江都而永歎。傅長沙而不歸。固亦魯值臧倉。楚逢靳尚。趙壹爲之哀歌。張升于是痛哭。有齊之季。不遇休明。申脰就鞅。屏迹無地。段珪張讓。金貝是視。賈謐郭淮。腥臊可厭。淫刑以逞。禍近池魚。耳聽惡來之讒。足踐龍逢之血。周氏末葉。仍值僻王。斂笏升階。汗流浹背。莒客之

踵躋焦原。匹茲非險。齊人之手執馬尾。方此未危。若乃羊腸句注之道。據鞍振策。武落雞田之外。櫛風沐雨。三旬九食。不敢稱憊。此之爲役。蓋其小小者耳。今泰運肇開。四門以穆。冕旒司契于上。夔龍佐命于下。岐伯善卷。恥徇幽憂。卞隨務光。悔從木石。余年在秋方。已迫知命。情禮宜退。不獲宴安。一葉從風。無損鄧林之欖植。雙鳧退飛。不虧渤澥之游泳。耕田鑿井。晚息晨興。候南山之朝雲。擊北堂之明月。汜勝九穀之書。觀其節制。崔寔四民之令。奉以周旋。晨荷簞笠。白屋黃冠之伍。夕談穀稼。霑體塗足之倫。濁酒盈罇。高歌滿席。恍兮惚兮。天地一指。此野人之樂也。子或以是羨余乎。客曰。吾子之事。旣聞之矣。佗人有心。又請論其梗槩。余答曰。雲飛泥沈。卑高異等。圓行方止。動息殊致。是以摩霄運海。輕爵羅于藪澤。五衢四照。忽斤斧于山林。余晚值昌辰。遂其弱尙。觀人事之隕穫。觀時路之遭危。元冬修夜。靜言長想。可以累歎悼心。流涕酸鼻。人之百年。脆促已甚。奔駒流電。不可爲辭。顧慕周章。數紀之內。窮通榮辱。事無足道。而有識者鮮。無識者多。褊隘凡近。輕險躁薄。居家則人面獸心。不孝不義。出門則詔諛讒佞。無愧無恥。退身知足。忘伯陽之炯戒。陳力就列。棄周任之格言。悠悠遠古。斯患已積。迄於近代。此蠹尤深。范卿攜讓之風。搢紳不嗣。夏書昏墊之罪。執政所安。朝露未晞。小車盈董石之巷。夕陽且落。阜蓋填閭竇之里。皆如脂如韋。俯僂匍匐。噉惡求媚。舐痔自親。美言諂笑。助其愉樂。詐泣佞哀。恤其喪紀。近通旨酒。遠貢文蛇。豔姬美女。委如脫屣。金銑玉華。棄同遺跡。及鄧通失路。一簪之賄無餘。梁冀就誅。五侯之貴將起。向之求官買職。晚謁晨趨。刺促望塵之舊遊。伊優上堂之夜客。始則亡魂褫魄。若牛兄之遇獸。心戰色沮。似葉公之見龍。俄而抵

掌揚眉。高視闊步。結侶棄廉公之第。攜手哭聖卿之門。華轂生塵。來如激矢。雀羅暫設。去等絕絃。飴蜜非甘。山川未阻。千變萬化。鬼出神入。爲此者皆衣冠士族。或有藝能不恥不仁。不畏不義。靡媿朋友。莫慙妻子。外呈厚貌。內蘊百心。繇是則紆青佩紫。牧州典郡。冠幘劫人。厚自封殖。妍歌妙舞。列鼎撞鐘。耳倦絲桐。口飢珍旨。雖素論以爲非。而時宰之不省。末俗蚩蚩。如此之敝。余則違時薄宦。屏息窮居。甚恥驅馳。深畏乾沒。心若死灰。不營勢利。家無儋石。不費囊錢。偶影聯官。將數十載。驚拙致笑。輕生所以告勞也。真人御宇。斲雕爲朴。人知榮辱。時反邕熙。風力上宰。內敷文教。方邵重臣。外揚武節。被之大道。洽以淳風。舉必以才。爵無濫授。稟斯首鼠。不預衣簪。阿黨比周。掃地俱盡。輕薄之儔。滅影竄迹。礫石變成瑾瑜。莠莠化爲芝蘭。曩之扇俗攪時。駸耳穢目。今悉不聞不見。莫余敢侮。易曰。聖人作而萬物覩。斯之謂乎。

蓀按盧子行以官塗淪滯。乃著此論。指切當時。與入周作聽蟬詩。遷武陽作孤鴻賦。同一憂愁所寄。而文之工。首推此篇。其詆斥物情。縱談世變。孝標絕交以外。能媿此者。尠矣。

源按隋書。思道字子行。范陽人。年十六。遇中山劉松。松爲人作碑銘。思道讀之。多所不解。於是感憤。閉戶讀書。師事河間邢子才。後思道以文示松。松亦不能甚解。乃喟然歎曰。學之有益。豈徒然哉。因就魏牧借異書。數年間。才學兼著。北齊文宣帝崩。朝士各作挽歌十首。選用魏收。陽休之等。不過三首。惟思道獨得八首。時人豔稱之。

宋公至長安。得姚泓時故大官丞程季者。了了人也。公曰。今日之食。何者最先。季曰。仲秋禦景。離蟬欲靜。變變曉風。淒淒夜冷。臣當此景。唯能說餅。公曰。善。季乃稱曰。安定噎鳩之麥。洛陽董德之磨。河東長若之葱。隴西舐背之犢。枹罕赤髓之羊。張掖北門之豉。然以銀屑煎以金銚。洞庭負霜之橘。仇池連蒂之椒。調以濟北之鹽。剉以新豐之雞。細如華山之玉屑。白如梁甫之銀泥。既聞香而口悶。亦見色而心迷。公曰。善。蓀按叔庠文加責璧食移。俱俶詭可喜。此尤膾炙人口。錄之以爲七發繼聲。

源按叔庠。吳興故彰人。文體清拔入古。甚爲沈約稱賞。好事者效之。謂爲吳均體。均注後漢書。著齊春秋廟記。十二州記。錢唐先賢傳。續文釋文集。共一百七十餘卷。又奉勅撰通史。起三皇。訖齊代。均草本紀世家已畢。惟列傳未就卒。

凌煙樓銘宋臨川王建

鮑照

臣聞憑颯薦響。唱徵效長。垂波鑿景。功少致深。是以冰臺築乎魏邑。鳳閣起於漢京。皆所以贊生通志。感悅幽情者也。伏見所製凌煙樓。樓置崇迴。延瞰平寂。卽秀神皋。因基地勢。東臨吳甸。西眺楚關。奔江永寫。鱗嶺相葺。重樹窮天。通原盡目。悲積陳古。賞絕舊年。誠可以暉曠高明。藻撤遠心矣。夫識緣感傾。事待言彰。匪言匪述。綿世罔傳。敢作銘曰。

巖巖崇樓。藐藐層隅。階基天削。戶牖雲區。瞰江列楹。望景延除。積清風露。合綵煙塗。俯窺淮海。俛眺荆吳。我王結駕。藻思神居。宜此萬春。修靈所扶。

曇隆法師誄

謝靈運

夫協理置論。百家未見其是。因心自了。一己不患其躓。而終莫相辨。我若咸歎。翻淪得拔。竟知于誰。冀行跡立。則善惡靡徵。欲聲名傳。則薰蕕同歇。然意非身之所挫。期出命之所限者。目所親覲。見之若人矣。慧心朗識。發于髻辮。生自豪華。家贏金帛。加以巧乘騎。解絲竹。秣絕景于康衢。弄絃管於華肆者。非徒經旬涉朔。彌歷年稔而已。諒趙李之咸陽。程鄭之臨邛矣。既而永夜獨悟。中飲興歎。曰悲夫。欣厭迭來。終歸憂苦。不杜其根。於何超絕。且三界迴沈。諸天倏瞬。況齊景牛山。趙武企陰。催促節物。逼迫霜露。推此願言。伊何能久。慨然有擯落榮華。兼濟物我之志。母氏矜其心。姊弟申其操。遂相許諾。出家求道。一身既然闔門離世。妻子長絕。歡娛永謝。豈唯向之靡樂。判之盛年。終古恩愛。於今仳別矣。旅舟南遡。投景廬嶽。一登石門。香鑪峯。六年不下嶺。僧衆不堪其操。法師不改其節。援物之念。不以幽居自抗。同學嬰疾。振錫萬里。相救。余時謝病東山。承風遙美。豈望人期。頗以山招。法師至止。鄙人榮役。前詩敍粗已記之。故不重煩。及中間反山。成說款盡。遂獲接棟重崖。俱浥迴澗。茹芝朮而共餌。披法言而同卷者。再歷寒暑。非直山陽靡喜愠之容。令尹一進己之色。實明悟幽微。祛滌近滯。蕩吝澡垢。日忘其疾。庶白首同居。而乖離無象。信順莫歸。徵集何緣。晚節罹膺。遠見參尋。至此阻關。音塵殆絕。值暑邁疾。未旬卽化。誠存亡命也。此行頗實。有由承凶感痛。實百常情。紙墨幾時。非以斯名。蓋欽志節。追感平生。自不能默已。故投懷援筆。其辭曰。仰尋形識。俯探理類。探聲知律。拔茅觀彙。物以靈異。人以智貴。卽是神明。觀鑒意謂。爰初在稚。慧心夙察。

吐噏芳華。懷抱日月。如彼蘭苑。風過氣越。如彼天倪。雲被光發。求名約身。規操束己。儻或遇世。曾未近似。生以意泰。意管生理。孰是歡慰。程鄭趙李。家畜金繒。才練藝技。驥首揮霍。繁紘綺靡。酒娛調促。意妍服侈。朝迫景曛。夕忘星徙。悠悠白日。淒淒良夜。年往歡流。厭來情舍。苦樂環迴。終卒代謝。棄而更適。生速名借。誰能易奪。何術推移。精粗渾淆。善惡參差。卽心有限。在理莫規。試覈衆肆。庶獲所窺。道家躋近。郡流缺遠。假名恆誰。傍義豈反。獨有兼忘。因心則善。傷物沈迷。羨彼驅遣。變服京師。振錫廬頂。長別榮冀。永息幽嶺。舍華襲素。去繁就省。人苦其難。子取其靜。昏之視明。卽愚成絕。智之秉情。對理斯涅。吝既弗祛。滯亦安拔。子之矜之。爲爾苦節。節苦在己。利貞存彼。以明闡逝。以茲累徙。欲以援物。先宜濟此。發軫情違。終然理是。梁鴻攜妻。荷蓀見子。雞黍接人。行歌通己。於世曰高。於道殊鄙。始見法師。獨絕神理。形壽易盡。然諾難判。乘心卽化。棄身靡歎。懷道彌厲。景命已冥。矜物辭山。終身旅館。嗚呼哀哉。魂氣隨之。延陵已了。鳶螻同施。漆園所曉。委骸空野。豈異豈矯。幸有遺餘。聊給蟲鳥。嗚呼哀哉。緬念生平。同幽共深。相率經始。偕是登臨。開石通澗。剔柯疏林。遠眺重疊。近矚峴嶽。事寡地閒。尋微探蹟。何句不研。奚疑弗析。帙舒軸卷。藏技紙襞。問來答往。俾日餘夕。沮溺耦耕。夷齊共薇。跡同心歡。事異意違。承疾懷灼。聞凶慙悲。孰云不痛。零淚沾衣。嗚呼哀哉。行久節移。地邊氣改。終秋中冬。踰桂投海。永念伊人。思深情倍。俯謝常人。仰愧無待。嗚呼哀哉。蓀按客兒。以衣冠世胄。俛仰新朝。情勢旣乖。卒以不免。然其慧心朗舌。如辨宗論。維摩讚。諸文俱深得。祇洹宗旨。可謂殫心。彼教者。此篇與慧遠法師誄。並稱極工。以集隘止鈔其一。

褚先生伯玉碑

孔稚圭

夫河洛摛寶。神道之功既傳。岱華吐祕。仙靈之迹可觀。蓋事詳於玉牒。理煥於金符。雖冥默殊源。顯晦異軌。測心觀古。可得而言焉。是以子晉笙歌。馭鳳於天海。王喬雲舉。控鶴於元都。有羽化蟬蛻。觸影遯形。神翥帝宮。迹留劍杖。遊瑤池而不返。宴元圃以忘歸。永嘉惡道者。窮地之險也。欵寶竭日。折石橫波。飛浪突雲。奔湍急箭。先生攀途躋阻。宿泄涉折。而衡飈夜鼓。山洪暴激。忽乃崩舟墜壑。一倒千仞。飄地淪高。翻透無底。徒侶判其冰碎。舟子悲其雹散。危魂中夜。赴阻相尋。方見先生。恬然安席。銘曰。關西升妙。洛右飛英。鳳吹金闕。簫鼓玉京。絕封萬古。乃旣先生。先生浩浩。唯神其道。泉石依情。煙霞入抱。祕影窮岫。孤栖幽草。心圖上元。志通大造。

蓀按此與北山移文筆意。如出兩手。

源按伯玉字元璩。吳郡錢唐人也。少有隱操。年十八。父爲之婚。婦入前門。伯玉從後門出。遂往剡。居瀑布山三十餘年。隔絕人物。宋孝建二年。聘本州議曹。從事不就。南齊高帝卽位。手詔吳會二郡。以禮迎遣。又辭疾。帝不欲違其志。勅於剡之白石山。建太平館居之。建元二年卒。稚圭從其受道法。爲於館側立碑。

招真館碑

簡文帝

夫東瀛淥水。三變成田。西嶽靈桃。千年未子。尙以星起牽牛。部首迢遞。律生甲子。氣數杳冥。況復上遊玉

清損之又損。高排金闕。元之又元。豈言象之能詮。非時節之所辨。海虞縣者。則虞農都尉太康置。其祖境有虞山。越絕書云。巫咸之所出也。高巖鬱起。帶青雲而作峯。瀑水懸流。雜天河而俱灑。雖日門採藥之地。楚望懷椒之歌。湯反流沙之魂。錦飾汾陰之鼎。無以喻焉。其峯則有石城石門。虛晚自然。不度句吳之馬。神功挺起。豈似岡陵之畫。魏后冰城。夜陣權息。長安慈石。浴鐵暫流。較跡比期。優劣斯遠。道士沛郡張君諱道裕。字宏真。卽漢朝天師陵十二代孫。天監二年。來至此岫。栖遁十有餘載。夜忽夢見聖祖云。峰下之地。而勢閒寂。宜立館宇。可以卜居。裕師潘洪。隱始甯四明山。無何。有人耳長短髮。云從虞山招真治來。言訖。忽然不見。潘馳信報君。君因辭山舊居。而以夢中所指峰下之地。卽以爲治。故號招真。高臺迴立。有類玉臺之山。長廓宛轉。還如步廊之岫。柱削芳桂。豈俟開陽木飛。材選海檀。無勞豫章神拔。黃庭司命之府。有類玲瓏。米陵赤石之觀。同符宏敞。遠望仲雍。而高墳蕭瑟。傍臨齊女。則衰壠蒼茫。蘚尋千仞之木。氣叶星晷。華飛五香之草。形圖宮室。帷葉綵花。卷舒蹊逕。陽桃侯棗。榮落巖崖。樹息金烏。簷依銀鳥。鳳將九子。應吹能歌。鶴生七歲。逐節成舞。旭日晨臨。同迎若華之色。夕陽斜影。俱成拂鏡之暉。玉礎微潤。應山雲於高牖。鴻籟徐響。引和風於空谷。方當專氣致柔。入無爲之竟。周行不殆。窮混成之致。茅子算歸。輟轡無已。魏姬宴罷。留駕不還。何止持節變淮南之金。傳符蒔北鐘之稻。明月蛟龍之騎。驅之使鬪。四銖七子之鏡。引以成刀。散季齋之羽。起雄鳴之霧而已哉。乃爲銘曰。

玉龜二始。金書八會。道浹地心。功浮天外。故帝可小。唯真能大。德起同塵。善生塞兌。物寶自然。人符交泰。

掩暎綠蘿。穹隆紫蓋。仙治之美。此焉爲最。雄柱千步。陽臺百丈。水均下颺。山踰高掌。野寂雲興。禽繁山響。升虹夕栖。豐雷朝上。元陽作石。竹龍成杖。書藏玉匣。藥蘊銀筒。燒鉛雜鯉。折桂和葱。羽衣可服。雲帡易通。斧柯雖朽。碑石無窮。

此篇載姑蘇志。題曰招真治記。治者。本道書言太上下二十四治。付張道陵布法於後嗣。後盡立治於元都。故稱治也。按陳馬樞道學傳。張裕起招真館。梁簡文爲製碑。故今亦沿之曰招真館碑。○藝文類聚。載其銘中數語。稱梁簡文招真館銘。其爲簡文筆無疑。姑蘇志訛爲昭明。今正之。

蓀按右跋語。見一百三家文集卷中。凡此類。皆錄文時。於各書中隨手附注。不能一一疏其姓氏矣。

天光寺碑

陸 倕

法雲旦聚。則浸潤被乎重沙。慧日晨燈。則暉光燭於有頃。皇帝乃把神珠。握靈鏡。擊天鼓。撞地鐘。驅日月之師。勒星辰之陣。九流外籍。五明內典。鳥策餘文。龍宮遺教。莫不神遊房奧。跡徧門牆。思洞希微。言窮名象。珉階凌虛。瓊籬鬱起。可使龍城愧飾。鴈塢慙珍。日宇奪暉。月宮掩麗。昔者姬水壽丘。載紀山川之目。丹陵負夏。僅傳鄉黨之名。歌酒故邑。賜復窮乎身世。堦簾舊里。高會止於當年。銘曰。被物如露。偃民猶草。解髻傳珠。抽衣受寶。化違宅火。功超河岸。捨我神居。興茲靈館。八襲豐殿。四柱高廊。並陳金壁。旁達玉箱。從橫雜樹。閒厠衆芳。

蓀按元帝爲倕作墓銘云。詞峯颺豎。逸氣雲浮。可謂太常知己。此文亦漏刻石闕之亞也。

常山公主碑

溫子昇

啓秦微之層構。闢閭闔之重扉。據天下以爲家。苞率土而光宅。然則昆山西峙。爰有夜光。漢水東流。是生明月。公主稟靈宸極。資和天地。芬芳有性。溫潤成質。自然祕遠。若上元之隔絳河。直置清高。類姮娥之衣桂樹。令淑之至。比光明於宵燭。幽閒之盛。匹穠華於桃李。託體宮闈。而執心撝順。婉然左辟。率禮如賓。舉華燭以宵征。動鳴佩而晨去。致肅雍于車乘。成清合於琴瑟。立行潔於清冰。抗志高於黃鵠。停輪表信。闔門示禮。終能成其子姓。貽厥孫謀。而鐘漏相催。日夜不息。川有流急。風無靜樹。奄辭身世。從宓妃於伊洛。遽捐館舍。追帝子於瀟湘。銘曰。

龍轡莫援。日車遂往。奄離形神。忽歸邱壤。祖歌薤露。出奏巫山。永厝中埜。終掩窮泉。蕭瑟神道。荒涼墓田。松檟徒列。琬琰空傳。

蓀按濟陰王暉業云。子昇文足以陵顏轅謝。含任吐沈。雖屬過情之譽。然卽以是碑論。其淵雅之致。正不易幾。能掩之者。惟蘭成諸夫人墓志耳。

源按子昇字鵬舉。太原人。與河間邢子才。邵。鉅鹿魏伯起。收。齊名。世號三才。

景明寺碑

邢邵

九土殊方。四生舛類。昏識異受。修短共時。德表生民。不救泰山之朽壤。義同列辟。豈濟灤水之淪胥。漂鹵倒戈之勢。浮江駕海之力。孰不曠息相催。飛馳共盡。泡沫不足成喻。風電詎可爲言。而皆遷延愛欲。馳逐

生死。眷彼深塵。迷茲大夜。坐積薪於火宅。負沈石於苦海。結習靡倦。憂畏延長。身世其猶夢想。榮辱譬諸幻化。未能照彼因緣。體茲空假。祛洗累惑。擯落塵埃。苦器易彫。危城難久。自發迹有生。會道無上。劫代緬邈。朕迹遐長。草木不能況缺。塵沙莫之比形。日晷停流。星光輟運。香雨旁注。甘露上懸。降靈迦衛。擁迹忍土。智出須彌。德踰大地。道尊世上。義重天中。銘曰。

大道何名。至功不器。理有罔適。法無殊致。能以託生。降體凡位。正覺如遠。一念斯在。德尊三界。神感四大。川流自斷。火室不然。衣生寶樹。座踊芳蓮。智固有極。道暢無邊。

蓀按子才本傳。祇載文學內行數大端。於禪解未有聞焉。然謂其高情達識。開遣滯累。固深得祇洹法趣者。何惑乎此文之工也。

大同哀辭

簡文帝

大同。字仁洽。予之第十九子也。生於仲秋。殞於冬末。悲夫。潛慟結於心。愁眉慘於外。夕坐於是。申旦當食。以之不甘。客有謂予曰。死生常也。天壽命也。陳蕃所憩之家。久傳紀錄之歲。華歆所聞之語。已定北陵之期。上聖所以忘情。賢者所以達節。將何戚焉。予對之曰。觀其明眸豐下。玉色和聲。豈不登髻歲而擬觸藩。及紈袴而知折李。靈心摧於毫末。慧識挫於趾步。庶方悟於來途。遂窮魂於短日。豈不傷哉。乃爲辭曰。含精鬱抑。歎嗟何極。云誰之悲。悲予弱息。實天道之偏頗。觀賦命之殊舛。彼神祭之靈長。獲萬春之悠緬。有舜華之照灼。寄一朝之浮命。始夢熊而非吉。遂設弧而表慶。驗天蘭之所受。知地井之可映。愛萱草之

有徵欣赤弗之在詠。信歎慰之未幾。悼天零之云及。乃變樂而爲悲。遂改笑而成泣。習珠襪之交舒。又金香之相襲。籍綺茵於弱肌。隱孩笑於羅帷。今獨親於元壤。亦何痛其如之。憶餘態而心楚。想媚質而迴腸。藥尙殘而染地。衣猶襞而在牀。卷金屏之四葉。開銀函之九年。忽徘徊而想像。曾何時而不傷。於星風景。暮鍾氣嚴晚候。葉蔽蔽而走塔。水戔戔而鳴漏。月半鏡而開河。雲羅柱而下岫。燈發焰而吐花。火含光而成就。金鹿之恨涕沾衣。金瓠之哀還掩扉。猶茲紫山明玉碎。譬彼西都芳草腓。終無逐浪鳧船反。何時復聞龍種歸。

蓀按帝誠當陽書。立身須謹重。文章須放蕩。然集中所載諸文。抑何其淵雅而整飭也。

徵君何子皙先生墓誌銘

簡文帝

先生履玉燭之正氣。應大賢之一期。實生而知機。撫塵斯庶。敬非習起。孝乃因心。聚徒教習。學侶或羣。與沛國劉瓛。汝南周顒。爲友。陸瑾。賀瑒。之徒。更道北面。永明中。王文憲儉。受詔撰禮。未竟而卒。屬在司徒文宣王。王以讓先生。因廣加刊緝。故以含文燕居。說六典五恩之義。或齊侯所不鎮。孟嘉所未知。皆折茲大物。成此良教。小人道長。每諷考槃之詩。君子道消。便執天山之筮。乃毀車挂冠。拂衣東嶺。始居若耶。來從秦望。今上經綸天地。權輿鼎業。始徵爲軍謀祭酒。實允文若之舉。且光彥先之選。又徵特進右光祿大夫。高尚其事。確乎不拔。元纁徒往。束帛虛歸。而給白衣尙書祿。固辭不受。卒窆乎其山。正衾在殯。嗤鏤器與玉衣。堯典入棺。恥密章及書綬。知與不知。並懷惋愴。咸以人亡素楮。禮墜文章。洙泗頽經。扶風罷學。關西

疑聖之德。自此長淪。高松引風之氣。於茲永息。余昔在朱方。亟枉翰迹。欽風味道。迄淹歲時。既而位阻桂宮。塗乖咫尺。不獲擁經步至。間春卿之病。徐輪三反。入村夷之舍。痛祥雲之滅采。悲列曜之晞暉。追勒高卿。乃爲銘曰。

文範高世。元晏絕倫。復有令德。遠之與均。誰與均此。嗚呼哲人。第五肥遁。餘軌尙遵。司空開學。其風不泯。傳茲孝歌。曰悌且仁。氣高瓊岳。心虛谷神。括羽儒囿。舟輿席珍。旣遊慧水。兼引法輪。談扇猶在。鳴琴尙陳。如何不慙。德素長淪。寂寥巖穴。荒涼渭濱。橋曰隻雞。徐稱酬素。欽欽夫子。風期夙著。蓄思含毫。傳芳寫譽。沈礎雖貞。元泉無曙。

源按子皙名點。廬江灣人。宋泰始末。徵太子洗馬。齊初。累徵中書侍郎。太子中庶子。並不應。梁武與點有舊。及踐祚。手詔論舊。賜以鹿皮巾等。徵爲侍中。辭病不起。與兄求弟胤。皆無宦情。世號何氏三高。

右南北朝文鈔二卷。國朝彭兆蓀輯。兆蓀字湘涵。號甘亭。陽湖人。貢生。嘗薦舉孝廉。方正不就。事蹟見國朝先正事略。案駢儷之文。自以導源蕭選爲極。則然自奇。偶旣判源流。遂分近時。陽湖李氏刊駢體文鈔。凡蕭選所錄一字不遺。於是賈生過秦論。太史公報任少卿書。乃均指爲駢體。宜爲陸祁孫輩所訾議也。是集託始南北朝。與王志堅四六法海。湯顯祖續文選。體例相同。最爲醇正。每篇間附評駁。考據數語。亦極精評。考甘亭平生論文宗旨。具見集中。荆石山房文集序。及與姚春木兩書。於虞通讓昏表。釋真親役僧書。皆詆毀不遺餘力。然此篇仍錄有釋真觀書。豈欲聊備一格耶。至篇中凡徐庾文及文選已有者。概不復列。然如劉峻山栖志。溫子昇寒陵山寺碑。亦以習見不收。此與姚鉉唐文粹。不載昌黎平淮西碑。或當別有微旨耳。竊謂南北朝人所著書。多以駢儷行之。亦均質雅可誦。如范蔚宗沈約之史論。劉勰文心雕龍。鍾嶸詩品。酈道元水經注。楊銜之洛陽伽藍記。斯皆篇章之珠澤。文采之鄧林。誠使勒爲一書。與此編相輔而行。足爲詞章家之圭臬。余向有是志。惜乎抗塵走俗。逢轉萍浮。頭白有期。汗青何日。擬俟山居稍有餘暇。當補成之。光緒乙亥。白露前二日。南海伍紹棠謹跋。